

अंतहीन वैतरणी

अंतहीन वैतरणी

डॉ. आभा पूर्वे



ISBN : ९७८.८१.९५७१७२.८.६

प्रथम संस्करण
२०२२

सर्वाधिकार ©
लेखिकाधीन

प्रकाशक
अंगिका संसद
सराय, भागलपुर
(बिहार)-८१२ ००२
E-mail : angikasansad@gmail.com

हरियाणा कार्यालय
वार्ड-३३, सेक्टर-२८
सरस्वती विहार, गुरुग्राम-१२२००२

आवरण-चित्र
www.pexels.com से साभार

मुद्रक
Das Printer
गोविंदपुरी, दिल्ली।

मूल्य
एक सौ पचास रुपये मात्र

Antheen Vaitarni
By Dr.Abha Purbey

Rs.150/-

ई उपन्यास
ऊ सब स्त्री सिनी लेली
जे अंतहीन वैतरणी के देखी भयभीत नै होय छै,
नै ओकरा पार करै के हौसलाहै छोड़ै छै
—आभा

उपन्यास के दोसरो संस्करण लेली

जबे ई उपन्यास के फेनु से पढ़ी रहलौ छेलिये ते लगलै, एकरौ कथावस्तु केन्हौ के गढ़लौ नै लगै छै। हेनौ घटना ते इखनियो घटी रहलौ छै हर समाज के बीच। एक बच्ची रहे ते रहे, हेनौ बच्ची ते घोर से लेके समाज के बीच सैकड़ो कपसते मिली जाय छै। यही से ई कथा के मनगढ़न्त मानवो ठीक नै होतै। जे ई कहानी हमरा सुनैले छेलै, हुए सकै छै वही अपनो घरों के कहानी घुमाय-फिराय के कही देले रहे आरो ऊ घटना सिनी ने एतै तखनी प्रभावित करले छेलै कि 'अंतहीन वैतरणी' लिखै ले विवश होय गेलिये।

पहिलो दाफी ते ई उपन्यास भागलपुर से ही प्रकाशित 'नई बात' में छपलो छेलै। संपादक राजेन्द्र प्रसाद सिंह जी के प्रति आभार। बाद में डॉ. अमरेन्द्र जी ने ई सौसे उपन्यास के आंगी में प्रकाशित करलके आरो पुस्तक रूप में भी।

ई सौभाग्ये कहों कि प्रकाशित होलै तें तिलकामांझी भागलपुर विश्वविद्यालय अंगिका विभाग के पाठ्यक्रम में शामिलो करी लेलौं गेलै ।

ई बात नें हमरा एतन्है उत्साहित करलें छेलै कि बीस सौ पन्द्रहे में एकरों द्वितीय संस्करण लेली सोचलें देलियै ।

खैर देरे सें सही, 'अंतहीन वैतरणी' के ई द्वितीय संस्करण आपने सिनी के हाथों में छै । सोचलें छेलियै, यैमें कुछ परिवर्तन करी लियै, फेनु एकरा ठीक नै बुझी कें हू-ब-हू प्रकाशित करी रहलौं छियै । कथानक भी वही, पात्र भी वही, भाषाओ वही ।

-आभा पूर्वे

विजयादशमी
५ अक्टूबर २०२२

अंतहीन वैतरणी

—बस तोरा तें एक्के झकनी लागलों छों कि ऊ घरों में हम्में आपनों बेटी के बिहा नै करें पारों । हम्में पूछे छियों, की खराबी छै ऊ खानदानों में ?

—कुछुवे नै । तैहियौ हम्में ऊ घरों में आपनों धिया कें नै दिये पारों । गरीबी सें बढी कें आरो कोय खराबी या दोष नै होय छै, बच्ची रों बाबू ।

—मतरकि गरीबी सें केकरौ खराब नै कैहलों जाबें सकें ।

—मगर गरीबी केकरौ खराब करें पारें, ई तें हुवें पारें नी ?

—सब्भे कें नै ।

—पर है की जरूरी छै कि हेकरा में सम्पत बाबू ही होतै । दरिद्री दर-दुखिया में भेद करले बिना केकरौ कैहियो ग्रासें सकें छै । सम्पत बाबू हरिश्चंद नै छेका ।

—जों तोरा यही लागलों छों, तें जाबे दौ, हम्में लड़का कें धन-दौलत सें लादी देबै ।

—मतरकि धन-दौलत रों माथा पर चढ़ी कें सरस्वती तें नै ऐतै । सरस्वती के बिना तें लछमियो के गोड़ों में पंख लागलों रहै छै । आखिर केन्हें लोगें लड़की कें पढ़लों-लिखलों लड़के रों हाथों में थमाय छै, मुरुख छै ?

—तें, लड़का के पढ़इयो देलों जैतै । आबें तें मानी जा ।”

बच्ची के बाबू जानकी प्रसाद ने आपनों दोनों कान पकड़ते, हुए कहलकै तें बच्ची माय मुस्कैते घरो से बाहर निकली गेलै ।

बच्ची माय के जैथें हुनी हाँक दै के बच्ची के बुलैलकै ।

—बेटी, तोहें पढ़ली-लिखली छौं । आपनों हित-अहित खूब बूझे पारें छौ । आबें जोन लड़का से तोहें बिहैली जाय रहलौ छौ तहुँ जानै छौ, ये संबंध में तोरों की राय छौ ?

—माय-बाबू सपनौ में धिया रों अहित नै सोचें पारें । बेटी तें बाबू कन अतिथि रं होय छै । आय यहाँ, कल कहाँ । अतिथि के तें हमरा सिनी देवता नी मानै छियै ? फेनु कुछु बात हम्मं केना सोचें पारौं ।

—धन्य-धन्य बेटी ! बेटिये एत्ते बाबू-माय पर विश्वास करें पारें ।

—विश्वास तें स्नेह आरो ममता से जन्मै छै । है हमरों आस्था तोरों ममतै के तें प्रतिदान छेकै । एक संतान, विश्वासे से तें माय-बाबू रों ममता से कुछु उन्नत हुवें पारें । कहतें-कहतें बच्ची रों आँख एकदम डबडबाय उठलै ।

—बेटी, है आँसू ? तोहें वकील जानकी जी के बेटी छेकी । आँसू के यहाँ की जरूरत ।

—क्षमा करियो ! बेटी तें बेटिये होय छै नी ! आरो वैनं ढलकी ऐलौ लोर के अँचरा से पोछी लेलकै ।

—लेकिन हमरों तें यही इच्छा छै कि तोहें बेटा के कलेजा लै के आगू बढ़ौ । आँसू आँखी पर आबी के दिन्हौ में आगू के रास्ता दिखावें नै दै छै, बेटी; तोरा जिन्दगी में बहुत आगू चलना छौं, हमरे नाँखी । पत्थर रं दिल बनाय के चलै लें लागतौं । जीवन के पुरुषार्थमय करै वास्ते स्त्रियो के कुछ स्त्रीत्व तेजै नै लागै छै ।

बच्ची कुछुवो नै बोललै । जानकी बाबू देखलकै कि ओकरों आँखी में पुरैनकै विश्वास आरो चमक आबी चुकलौ छेलै ।

तें जानकी जी ने ओकरा आपनों नगीच बैठैतें कहबो शुरू करलकै ।

—बेटी, तोरों मायके तें जिद यही पकड़लें छीं कि गरीबों घरों में धिया नै दियें पारौं । मतरकि नै तें तोहीं, नै तोरों माय जानै छीं कि हमरों अतीत की रैल्हों छै । याद करतै सौंसे देह दुखें लागै छै । कहै लें तें नै चाहे छियौं लकिन सुनों—तोरों दादा दू भाय छेलौं । दूसरा के दोभियौं तोरों दादी नै आपनों बिहैली बेटी कें दही कंतरी में जेवरात भेजना शुरू करलकौं । ऊपरों सें जमैलौं दही । तें घरों के सबटा लक्ष्मी बाहर भै गेलै । बड़का दादा कें धनों सें कोय मतलबे नै छेलौं, एकटा मेम राखी लेलें छेलौं । जे सेर भरी सोना के दाम ऐलौं बिना मूँ में दतवन नै दै छेलौं वही घरों सें लछमी हेनौं गेलै कि तोरों आपनों दादा एक मन गेहूँ पीसै छेलौं, तें हमरा सिनी खइयै । हमरो बीहा जहां भेलै, एकदम दरिद्र घराना में । की कहियौं । है जे सम्पत देखै छौ, तोरों जन्मों के बादे सें । दरभंगा महाराज के वकील कें काम करयै तोहें पेट में छेली । हुनी पुछैलकै कि चाहियौं ? जमीन मांगलियै । जानै छौ, मधेपुरा के डेढ़ सौ बीघा जमीन हमरों नामों लिखलकै आरो तोरों जनम होतें-होतें तें घरों में धौन उगटें लागलै । वहीं सें तोरा हममें लछमी बेटी कहै छियौ । धनों सें कत्तो गरीब घोर रहतै तोरों गोड़ पड़तै धौन बरसतै ।

बच्ची बात कें समझी जरा लजाय उठलै आरो बाहर निकली गेलै । जानकी बाबू के चेहरा पर खुशी दौड़ी गेलै ।

:: २ ::

सौंसे तारापुर में हल्ला छै कि जानकी बाबू के बेटी सें सम्पत बाबू के पैहलौं लड़का के बीहा लागी रैल्हों छै । सम्पत बाबू कें आबें सम्पत मिलतै आभी तांय तें आपनों नामों के हंसिये उड़ाय रहलौं छेलै ।

अंतहीन वैतरणी □ ११

—पर बीहा रुकौ पारें ।
 —से की ?
 —सुनै में ऐलों छै कि लड़की के लड़का सें कुंडली नै मिलै छै ।
 —तबें की होतै ?
 —होतै की । सुनै छियै सम्पत बाबू बोली रहलौ छै, शादी तें होने छै । नै बड़का सें तें छोटका सें । मतरकि हेनों लछमी नै छोड़लौ जाबें पारें । केन्हों कें भी नै ।
 —तें की लड़की वाला मानी जैतें ?
 —सुनें में तें ऐलौ छै की लड़की वाला कें भी दूसरे लड़का पसंद छै ।

सुनै में यहू ऐलों छै की जानकी बाबू के कोय लड़का लड़की नै बचै छै से शादी रुकौ पारें । कै-कै सन्तान मरी चुकलौ छै । यहू लड़की तें मरी कें बचलौ छै । कते होम-हाम पर जीवित छै ।

—हम्मू सुनलौ छियै कि लड़की के दादा नें पूर्व जनम में एक वेश्या के पेट गिरचैलें छेलै, सेहे कारने हिनकों ई जनमों में कोय संतान नै बचै छै । सुनै में ऐलों छै कि हेकरोँ घोसना जोतिश जी नें जानकी जी कें शादिये वक्ती करी देलें छेलै ।

—तें की सोचे छों, शादी रुकी जैतै ?
 —सपनों में नै । सम्पत बाबुओ पंडित सें बुझलें छै । लाखो में एक गुनवन्ती लड़की छै ।

तबें तें है बीहा होले होलौ समझौं ।
 खेसाड़ी साव नें मूड़ी हिलैतें हुवें आरो आगू कहलकै ।
 —दू राय नै । जानकी बाबू बड़के कांग्रेसी नेता छेकै । सम्पत बाबू के इज्जत बढ़तै अलगे । अरे आय कल तें वही बड़का आदमी जेकरो परिचय संबंध बड़का नेता सें नै तें नामियो नामी गुनी पानी के मोल बिकाबै छै ।

—से तें ठिक्के कहै छौ । सम्पत बाबू सोचतें होतें, नै कुछु तें बेटा कें नौकरी तें मिली जैतौं । तोहें तें हुनकों मनो के बात बोली

देलौ । पटवारी मड़रों नें समर्थन में हामी भरलकै ।
सौंसे गाँव में यही रं के बात होते रहै, कोय कुछ कोय कुछ ।
गाँव के बच्चा सिनी उछली-उछली गाबै,
सेमल भैया रों बीहा होतै,
भागलपुर के कनियाय लानतै,
कनियाय छेकै लाल परी,
भैया के जैतें भाग संवरी ।

:: ३ ::

बच्ची के शादी होवों तें भै गेलै । सम्पत बाबू के बड़का बेटा
सेमल सें । पंडिते कहलकै, बड़का बेटा के रहतें छोटका सें बीहा दोखपूर्ण
होतै । दोखपूर्ण छै तें हमरों बेटा पर असर हुवें पारें । बच्ची माय कही
उठलै ।

—तोरों तें मतिये उल्टा चलै छों । ई कही कें जानकी जी नें
आपनों पत्नी कें डाँटी देलें छेलै ।

ठीक लड़की आशीर्वादी के दस रोज पहिले बच्ची टायफाइड रों
शिकार भै गेलै । बाल उड़ी कें चानी निकली ऐलै । देखै सें जेना एकदम
सन्यासी ।

—देखलौ नी, कहै छेलियों ।

बच्ची माय गुस्सा से लाल-पीरों भै रैल्ही छै ।

—आबें खूब करों बीहा । पहलें बेटा रों जान नी बचावों !

बच्ची माय धीरज रखों ।

जानकी बाबू घबरैलों बोली में बोलै छै ।

—आभौ धीरजे राखे के समय छै ? देखै नै छौ; छोड़ी सूखी कें

अंतहीन वैतरणी □ १३

केन्हों बनी गेलों छै ! एकदम कांटों ।

—बच्ची माय, जोतिष की कहलें छेलों, बच्ची घनिष्ट राशि रों छेकै । फेनु घबड़ैबों की ? धन कहीं दुख दैलें आबें छै ?

कहतें-कहतें जानकियो बाबू रों आँख डबडबाय गेलै । ई देखी कें तें बच्ची माय हरहराय कें कानी पड़लै । कोठरी रों भीतर सेवा करवैया के भीड़ जुटलें छेलै । होम जाप अलग !

बनारस रों पंडित मंगैलों गेलों छेलै, जाप वास्तें । आखिर चालीस दिनों रों बाद बच्ची खटिया पर सें उठलै । उठलै तें एकदम बदरूपे होय कें । माय-बाबू कें चिन्ता हुवें लागलै कि कहीं बीहा नै भंगटी जाय । तै करलें गेलै कि बच्ची कें लै कें भुवनेश्वर चली देलें जाय । वांही से सेहत बनला पर ऐलों जैतै ।

ठीक जोन दिन जानकी बाबू परिवार साथें भुवनेश्वर निकलतिथै, ओकरोँ एक दिन पैहलें सम्पत बाबू चार आदमी लेलें पहुँची गेलै लड़की कें आशीर्वादी करै लें ।

जानकी बाबू नें बहुत टालै रों कोशिश करलकै मतरकि हुनका सिनी एक नै मानलकै ।

जानकी बाबू नें कारण साफ-साफ राखलकै तें सम्पत जी कहलकै । अबें बीमारिये कारण तें हेनों होलों छै, हेकरा में की छै । हमरा सिनी दिन बनाय कें ऐलों छी घुरै नै पारों ।

बच्ची रों माय-बाबू के भी मने रों बात होय रैल्लहों छेलै, से जानकियो बाबू जादा विरोध नै करलकै ।

कानो-कान खबर फैली गेलै कि बच्ची रों आशीर्वादी होय रैल्लहों छै । जनानी सिनी के ऐंगना में जुटवों शुरु भै गेलै ।

मुहल्ला भरी के नामी-गरामी आदमी जुटी ऐलै । सौर-सवासिन अलगे घोर गन-गन करें लागलै । सम्पत जी रों खुशी माथा पर चढ़ी नाची रैल्लहों छेलै । आशीर्वादी के काम खत्म भेलै तें सम्पत बाबू नें जानकी जी रों हाथ धरतें कहलकै ।

—आबें बीहा में देर नै करियो ।

—लड़की के देह लागै तांय तें रुकै लें पड़ै ।
 —है की बोलै छियै जानकी बाबू बीहा तें यही महीना में होय जाय तें अच्छा ।
 —अरे ई महीना पूरे में तें दसे रोज बाकी छै । नेतों ल्यौन, हेकरै में तें बीस रोज लागी जैतै । जानकी बाबू रों बेटी के बीहा छेकै सम्पत बाबू ! ओकरो में लछमी बेटी के ।
 —से बात तें ठीक छै मतरकि शुभ काम जत्तें जल्दी हुवें सेहे ठीक । पंडितो यही पक्ख शुभ बताय रेल्हों छै ।
 —मजकि एतना जल्दी केन्हों संभवे नै छै ।
 —नै तें अगला महीना में तें कोय्यो हालतों में करै लें पड़तों ।
 आखरियो महीना ।
 बात बहस में आखिर यही तै भेलै कि शादी अगला महीना फागुन में करलों जैतै । सम्पत जी के जोर के सामना जानकी बाबू कें झूकै लें पड़लै ।

:: ४ ::

आशीर्वादी सें ठीक चालीसवां दिन बच्ची के बीहा होय रहलों छेलै । कहलगांव, मुंगेर, सहरसा, दरभंगा कहाँ-कहाँ से नै लोग जुटलों छेलै । जेना छोटों-मोटों बौंसिये मेला लागी गेलों रहै ।
 शहर के सब नामी रोसैया आरो हलवाय मंगैलों गेलों छेलै, मुंगेर से बाजा मंगैलों गेलों छै । कागज के घोड़ा पर नांचैवाला अलग । घरों के बाहर सड़कों तांय रौशनी सें सजैलों गेलों छै ।
 गीत-नाद के झंकार आकाश छुवी रहलों छै । जनानी के कंठों सें लय उमड़लों आबी रहलों छै ।

अंतहीन वैतरणी □ १५

हरिहर बाँस कटैयी हो दादा !
ऊँचकाय मँड़वा छरावों !
आवी पड़लै दादा हमरों बनिजवा,
दूसतौ मंडवा तोहार हो ।
एक ठियाँ बैठलों नौआ बराहमन,
मांझे ठियां बैठलों राजा दुलहवा,
आबें रों केकरों कन्या दान ।

जनानी रों रागों में राग मिलैतें हुवें तुतरुवाला भी गावी रैल्हों
छै, पीं पी पी ई... ।

बारात के द्वार लगहैं पीपिहिया बाजा रों आवाज आरो तेज
होय उठलै । बच्चा-बच्ची दौड़ी पड़लै सराती तरफों के सब सम्मानित
लोग सड़कों तक खातिरदारी में निकली ऐलै ।

जनानियो सिनी गल्लों खोली कें गाना शुरु करलकै,
नदिया रों तीरें-तीरें अइले बरियाती,
चिन्हलो नै जाय छैं गे बेटी आपनों दामाद ।
सबही बरतिया रों लाली लाली पगड़ी,
चिन्हलों नै जाय छै गे बेटी आपनों दामाद ।

मतरकि कानाफुसियो कहू होय रैल्हों छै,
—जे कहों, बाराती सजी-धजी कें नै ऐलों छै,
—जानकी बाबू रों नाम हंसाय देलकै ।
—भारी कंजूस परिवार बुझाय छै ।
—केना हेनों परिवारों में जानकी बाबू बच्ची रों बीहा लगैलकै?
—लड़का देखी कें ।

—आरो सब तें नै कहै पारों मजकि देखै में तें एकदम
राजकुमारे लागै छै लड़का !

—एकदम बच्ची में मेल खायवाला ।

शादी से दू दिन बादो बाराती कें रोकलों गेलै । बनारस से
खास करी कें मंगैलों गेलों इत्र के खुशबू मुहल्ला भरी में उड़तें रैलहै ।

नाच-गान में जरियो कमी नै ऐलै, नै भोज-भात में एक्को दिन कमी करलौं गेलै । मुहल्ला-मुहल्ला में चर्चा छै ।

—बीहा तें बहुत्ते देखलौं मतरकि है रं के नै ।

—परो परिजन कें गोतिये रं मान-मर्यादा मिललै । के करै छै ?

—जी खोली कें लड़का पक्षों कें देवे करलकै,

—दस ठो तें खाली लड़के कें सोना के अंगूठी मिललै भारी-भारी ।

—तीन भर सें ऊपर के अंगूठी छेकै ।

—बच्ची कें तें पच्चीस भर सोना रों जेवर मिललौं छै, तीन किलो चांदी के अलग ।

—आरो एक बात जानला कि नै ?

—की ?

—लड़कावाला तरफों सें एक्को पैसा जेवर नै ऐलौं छै । एकदम खूंगटें बुझाय छै ।

—अरे समधी जी कें गारी दै छौ !

—समधिये कें तें गारी दै के हमरा सिनी कें हक छै ।

—समधी साथें कुछुवों करलौं जावें सकें । की ?

एक जोरदार हंसी मड़वा में गूंजी गेलै ।

जखनी बारात बिदाय हुवें लागलें तें सबके आँखी में लोर छेलै । की जनानी, मरदानौ के आँख भींगी गेलै ।

दुबारी पर ठसमठस औरतों के भीड़ ।

सब्भे के अंचरा आँखी पर छेलै आरो सब्भे के मुँहों पर बस एक्के गीत,

कथी बिनू सुन भेलै बाबा के बगीचबा ?

कथी बिनू सुन भेलै दादा के अटरिया ?

कोयलो बिनू सुन भेलै बाबा के बगीचवा

धिया बिनू सुन रे भेलै दादा के अटरिया

ऐंगना बूलिये बूलिये अम्मा रोवे ऐंगना ।

आरो जखनी बच्ची डोली में बैठलौं छेलै तखनी तें बच्ची के

बाबुओ आपनों कपसवों नै रोकै पारलकै । अजीब करुण दृश्य खाड़ों होय गेलों छेलै ।

:: ५ ::

बच्ची जबें ससुराल उतरलै तें ओकरोँ खातिरदारी करै वास्तें खाली ओकरोँ एक सासेँ खाड़ी छेलै, आरो कोय्यो जनानी नै । बच्ची नें आपनों घूँघटा के नीचेँ सेँ सब कुछ कोनराय केँ देखलें छेलै । वैनेँ मनोँ में कत्ते-कत्तेँ बात सोचलें छेलै, कत्ते-कत्तेँ अरमान लैकेँ बाबू के द्दारी सेँ डोली पर चढ़लें छेलै मतर कि ससुराल के द्दार लगथै ओकरोँ सब सपना टूटी-टूटी केँ बिखरी गेलै । गलसेदी करै वास्तें बस ओकरोँ सासे आगू दिस बढ़लें छेलै । न कोय गीत गावै वाली आरो नै तें कोय कनियाइन केँ उतरै वाली । बच्ची के मनोँ में एक बार होलै कि ऊ घूमी केँ फेनु डोली पर बैठी जाय आरो कहारों केँ कहै डोली घुमाय लेली । मतरकि बच्ची है सब कुछ नै करै सकलकै खाली ई छोड़ी केँ कि ऊ चुपचाप गलसेदी करैला के बाद द्दारी के बाद घरों के ऐंगन दिस बढ़ी गेलै ।

कन्हौ, कहूँ, कुछवे बीहा रं नै लागी रैहलें छेलै । बस ऐंगना में एक बड़ों रं पेट्रोमेक्स के रोशनी सन-सन के आवाज के साथें होय रैहलें छेलै । ऐंगना के उत्तरवारी ओहारी पर दस ठो आदमी खाना खाय रैहलें छेलै । बस बीहा के नाम पर ऐतनै लोग वहाँ इकट्ठा छेलै । बच्ची नै जानलकै कि ससुराल में कनियाइन के साथे की रस्म-रिवाज करलें जाय छै । ओकरा आपनों माय-बाबू पर काफी गोस्सा होय ऐलें छेलै । आखिर की देखी केँ बाबू हमरा ई घरों में बिहाय देलकै ? जबें ऊ कुंवारी छेलै तें आपनों कत्तेँ सखी सहेली के बीहा देखलें छेलै,

१८ □ अंतहीन वैतरणी

टोला-पड़ोसी में ऐलों कनियाइन के रस्म-रिवाज । डलिया में पैर रखवाय-रखवाय के सुलक्षणा के घोर करलें गेलें छेलै । खाली सुलक्षणै के बात नै छै । चंदा, नीलम, सुरेखा, जबें दुलहिन बनी के आपनों ससुराल ऐलों छेलै तबें कत्तें साज-बाज आरो हुलासो के साथ सें ऐंगना ओकरा सिनी के करलें गेलें छेलै । यहाँ तें बाजा के नाम पर एक कंडाल भी नै छेलै ।

बच्ची आबें करौ की सकें छेलै । आबें तें जेना जिनगी कटना छेलै होनै के कटतै । बच्ची मनेमन आपने के ऊ स्थिति वास्तें तैयार करी लेलकै । नै दुलहिन तें घरों के पुरानों-सुरानों जनानिये नांकी । जोन दिन से बच्ची ससुराल में पैर धरलें छै वही दिनों सें दुल्हो के घोर ऐवो बंद होय गेलें छै । बच्ची के ई बातों के लैके घोर आचरज छेलै, मतरकि एकरो सें बढ़ी के ई बातों के छेलें कि कोय्यो है चीज के लैके घरों में परेशान नै छेलै । वैंने जानलकै नै कि सुहाग रात केकरा कहै छै आरो केकरा कहै छै पति के सामना लजैबौ, मान करबों । ऊ तें ऐला के बाद सें परित्यक्त के दुख उठाय रहलें छेलै । आखिर नै रैहलें गेलै तें वैंने सास सें जायके पुछलकै, हिनी कहीं बाहर गेलें छै की ?

हमरा की मालूम । बाहर गेलें छै की घोर । कहूँ गेलें होतै, तें घुरिये ऐतै ऐकरा में औनाबै के की बात छै !

सासु के हेनों तीक्खो वचन सुनी के बच्ची के छाती चलनी रं होय गेलें छेलै । वैं मने-मन सोचलकै, एक तें लाज छोड़ी के कुछ पुछलें गेलां । आखिर पुछवों करतिये केकरा सें, घरों में जनानी के नामों पर एक सास छोड़ी के आरो छेवे करै के । ओकरों पर सासू के हेनों जरलें वचन । बच्ची के मनो में होलै कि ऊ पीछू बाड़ी दिस इनारा में धौंस दै दै । हेनों जीतो रैहबों सें तें मरबे अच्छा । मतरकि मरना एतना आसान छै ? मनो में कत्तें-कत्तें इच्छा बसलें रहै छै आदमी के जे आदमी के मरौ लें नै दै छै । बच्ची सोचलकै, आखिर अभी वैं देखलै की छै । जो दुख देखना छै तें खुली के देखना अच्छा । फेनू यहू के कहें पारै कि हुनी हमरा सें गोसैये के घोर नै आबी रहलें छै । आखिर

हम्में करलहै की छियै ? आभी तें दुओ बात मुंहों सें नै है सकलें छियै । तबें अपमान करै के बाते कहां उठै छै । कहीं हिनका हमरा सें बीहा नै करै के इच्छा छेलै ? कहीं आपनों माय-बाप के जोर-जबरदस्ती से तें है बीहा नै करी लेलकै । बच्ची के मनो में पले-पल शंका के बुलबुला उठै आरो फुटी जाय । वें मने-मन शंका सुलझावै आरो एक शंका सुलझवो नै करै कि तखनिये दूसरा उठी जाय । हेने मानसिक हालतों में वै आरो कै दिन काटी लेलकै ।

:: ६ ::

ससुराल ऐलों बच्ची कें आय पनरमा दिन होय रैहलें छै । ओकरो खुशी कें कोय ठिकानो नै छै । कैन्हें की ओकरा खबर मिललें छै, ओकरो पति लौटी ऐलों छै । सांझिये से वें आपनों कोठरी में अपनों पति कें आवै रो इंतजार करें लागलें छेलै ।

रात के ग्याह बजतें होतें । जखनी सेमल लौटलै । ऐतें ही उ बच्ची के कोठरी में सीधे घुसी गेलै जेना ओकरा पता रहै कि बच्ची कौन घरों में होतै । घर के सब लाग निभोर सुती चुकलें छेलै । पता नै सेमल केना फाटक खोली कें ऐंगना दुकलें छेलै । बच्ची ये सब बातों पर अभी आरो सोचवे करतियै कि तखनिये सेमल बिछावन पर सें लेटले लेटले कहलकै, अरे अभी तांय तोहें जागी रहलें छौ । कथिलें ? कि हमरा लें ? तें बेकारे जागी रैहलें छौ ।

सेमल सें हेनो खुरदरो वचन के आशा बच्ची कें नै छेलै । आबे तें ओकरो बचलो-खुचलो हृदय-रस भी सूखी कें रेत में बदली गेलै । ओकरो मौन कैन्हो-कैन्हो करें लागलै । सेमल के हेना रूखो वचन सुनै वास्तें ऊ कभियो तैयार नै छेलै । से वें ने आपनों दोनो हाथ दोनो

कानों पर राखी लेलकै, ताकि आरो कोय रुक्खों बात वै नै सुनें सकें ।
कानों पर हाथ रखते देखि के सेमल नें उठी के बैठते हुवे कहलकै ।

कि कान में कोय तकलीफ छी ? जों हेनो बात छेलै तेँ माय के कहलौ केन्हें नी गाँव के कोय वैद्य बुलाय देतियो । दुए पुड़िया में तेँ सब रोग पार ।

बच्ची नें कभियो ई चीज के कल्पना नै करले छेलै कि आदमी हेनो रुक्खों हुवे सकें छै । ओकरो मॉन हेने करै लागलै कि ऊ जोर-जोर से चिल्लावेँ लगे । आरो कहै कि सेमल जों तोहें हेने पत्थर दिलो के छौ तेँ हमरा सेँ बीहे कथिलेँ करला ? वैने कुछु जवाब नै देलकै । बच्ची के कुछुवो जवाब नै पाबी केँ सेमल आपनै उठलै आरो ओकरो हाथ पकड़तेँ हुवेँ बिछौना पर लेटाय देलकै, ई कहतेँ हुवेँ,

सूती रहोँ आबेँ तेँ बिहान होलै पर कुछ करलोँ जाबेँ सकै ।
आराम करला सेँ दरदो कुछ कम होय जैतोँ ।

आरो ई कहिकेँ सेमल स्वयं उलटी केँ सुती रहलै ई कहतेँ हुवेँ कि ऊ काफी थकी गेलोँ छै । गाड़ी खराब होय गेला के कारण पांच कोस पैदल चली केँ आवै लें पड़लोँ छै ।

आरो ठीके में देखथेँ-देखथेँ सेमल खरटा लियेँ लागलै, घर-घर । जेकरो आवाज में बच्ची के सब सोचलोँ-विचारलोँ संगीत विहीन हुवेँ लागलै ओकरा लागलै कि ओकरो चारो ओर युद्ध रोँ नगाड़ा बजतेँ रहेँ सेमल खरटा तेँ हेने छेलै । उ एतेँ घबड़ाय उठलै कि ओकरा लागलै जेना वेँ झकझोरी सेमल केँ जगाय देतेँ आरो कहतेँ—भगवान वास्तेँ तोहोँ दूसरोँ कोठरी में चल्तोँ जा आरो हमरा यहीं अकेला छोड़ी दा, जियै लें । शायद ई कहै वास्तेँ उठियो केँ खाड़ी भै गेलै । मतरकि ओकरा सेँ कुछुवो नै कहलोँ गेलै । बस कुछ कहै के कोशिश में ओकरो आँखी सेँ खाली लोर टप-टप गिरतेँ रहलै । कखनी तक, है कोय नै कहें पारें ।

भोरे सेमल उठलै तेँ वै बच्ची केँ आपनोँ गोड़थारी में जुतलोँ पैलकै । ऊ उठी बैठलै आरो बच्चियो केँ जगैतेँ हुवेँ कहलकै,

सुनोँ, हममें बाबू के कामोँ सेँ बाहर जाय रहलोँ छी । वैद्य सेँ

दवा मंगवाय लियोँ ।

लेकिन तोहों लौटवा कखनी तक ? बच्ची नें धीरें सें पूछलकै ।
हमरोँ लौटै, नै लौटै के तोहें चिन्ता नै करों ।

चिन्ता केना नै करना छै । आन मरद के बात तें नै छेकै, तोहें
हमरोँ पति छेकोँ । तोरोँ आबै जाबै के खबर हमरा होनै चाहियोँ ।

तें तहूँ ई बात जानी ला, हमरोँ आबै-जाय के खबर आय तक
न कोय रखलें छै न कोय राखतै ।

मरद स्वतंत्र होय के ई धरती पर जियै छै, स्वतंत्र होय केँ मरै
छै । शादी होला के मतलब है नै होय जाय छै कि हममें तोरोँ गुलाम
होय गेलियोँ । आरो हमरा हर काम तोरा जानकारी दै केँ करै लें लागै ।

आरो ई कहिकेँ सेमल चुपचाप कोठरी सें बाहर ऐंगना में
निकली ऐलोँ छेलै । एक बार वें घुरी केँ बच्ची केँ देखलकै पर तखनिये
ऊ ऐंगना से बाहरोँ निकली गेलै एकदम आधिये नांकी । बच्ची के
आँखों में जेना मुट्ठी-मुट्ठी भर धुरदा झोंकते हुँएँ कि ओकरा कुछ भी
दिखाय नै पड़ें लागलै । ऊ थकथकाय केँ वही खटिया पर बैठी गेलै ।
सोचें लागलै आपनों भावी जिनगी के बारे में, केना केँ कटतै आकरोँ
हेतें पहाड़ हेनोँ जिनगी जों ओकरोँ पतित हेनै केँ व्यवहार करतें रहलै ?

:: ७ ::

बच्ची धीरे-धीरे आपनों ससुराल के बारे में जानना-सुनना शुरु
करी देलें छेलै । ओकरोँ पास गामे के एक दाय आबे छै, ओकरोँ
देह-हाथ जोतैलें । देह-हाथ जोतै बकतिये ऊ दासी बीचों के बात बताय
छै ।

—तोहरोँ ददिया ससुर बड़ी सम्पत वाला छेलौँ । धरम-करम भी

२२ □ अंतहीन वैतरणी

खूब करै वाला यै लेली भगवाने हुनका सम्पतियो खूब देलें छेलै दानियो कम नै छेलौं । जब तक जिन्दा रहलौं, दान-धरम करतै रहलौं । सेहे कारण छेलै कि जबे हुनी मरलौं, तें गांव टोला के केकरो नै आँख चूलै ! कि कहियौं कनियाइन हुनको सम्पत जोगाय के तोहरो ससुर नै राखै पारलकौं ।

—से कि भेलै ? बच्ची नें जानकारी लेली पूछलकै ।

—ओत्तें तें हम्में नै बतावै पारवौं कनियाइन मतरकि धनो-दान धरमे सें रहै छै । लछमीयो आदमी के स्वभावे देखिकें रह्लौं । तोरो ससुर तक अधिकार ऐतें-ऐतें तें घरों के रंगे बदली गेलै । भागो होय छै केकरो-केकरो । तोरो ससुर जैतै धोन के बढ़ाय लै सोचै छौ ओत्ते लक्ष्मी हुनका सें दूर हटें लागै छै । पूरबे जनम के भाग कहौं ।

बच्ची नें दैये के मुंहों सें ई जानलकै कि ओकरो सास कत्तें बोलबक्का आरो भारी कैयां छै । केकरो नै गुदानै वाली । दैयें बच्ची के बतैलकै, सासु से दूरे रहै के नै तें एक्को करम बाकी नै छोड़ै पारें । आरो वही दिनों सें बच्ची के मनो में जे डोर घिरना बैठलै तें जिनगी भर बैठले रहलै । है बात नै छेलै दाय नें बढ़ाय-चढ़ाय के कहलै छेलै, मजकि वैं जे, भी बतैलें छेलै सासु के बारे में कम्मे बतैलें छेलै । साल पुरतै नै पुरतै ओकरो सामने सास रों खारों स्वभाव उबटी-उबटी कें आबें लागलै ।

:: ८ ::

माघी पूर्णिमा छेलै । जाड़ एकदम बाघे नांकी चारो तरफ गुराय-गुराय के आदमी कें निगलें लागलौं छेलै । बूढ़ों-पुरानों वास्तें तें जेना कें परलय आवी गेलौं रहै । अच्छा-अच्छा धार्मिक लोगो के नहैबौ

अंतहीन वैतरणी □ २३

आरो धरम करबों छुटी गेलों छेलै । रजैय्ये तरों से मंत्रोच्चार हुवें आरो बिछौने पर बैठलों-बैठलों खाना के व्यवस्था । बच्ची कें आबे घरों के सब काम करै लें लागै । जहां तक सेमल के बात छेलै ऊ तें घरों में रहबे नै करै, कि बच्ची कें एत्तें काम करै सें मनौ करतियै । रैहबो करतियै तें की । कबें बच्ची के सुख-दुख के बारे में वै सोचलें छेलै । जे आय सोचतियै !

माघ के ठंडा अबकि पूसो सें ज्यादा बढ़ी गेलों छेलै । हांड तक में ठंडा घुसी-घुसी कें दलकाबें लागलें छेलै आरो हेनो में बच्ची कें घरों के सब काम करै लें पड़ै । खाना बनाना सें लै कें सबकें खाना खिलाय तक के काम ओकरो माथा पर । ठंडा सें बचै वास्तें एक बहुत पुरानों सौल ओकरो देहों पर पड़लों रहै । बच्ची आपनों दादी नानी सें कहानियों सुनलै छेलै कि केना कें सासें पुतोहू कें सतावै । ओकरा आपनों बेटा सें चुरबावै । तबें तें बच्ची कें यही लागै कि नानी-दादी झूठ बालै छै । कहूँ हेनों हुवें पार कि एक सांय आपनों माय के कहला पर आपनों जनानी के पीटें । मूड़ी तक काटी लै ।

सीतलहरी में काम करतें-करतें ओकरा आपनों नैहर के बुढ़िया मौसी के ख्याल आबी जाय जे जांतों पीसे वक्ती गीत गावै । जेकरा में एक बहू के कहानी छै, केना कें ओकरो सास बीमार होय के बहाना करी कोठा पर जाय कें सुती रैहलों । जबें ओकरो सांय ऐलै तें पूछलकै हमरो माय कहाँ छै ? कनियैनी कहलकै—कोठा पर सुतलों छै । मिजाज खराब छै । बेटां जाय कें पूछलकै, की होलों माय ? तें माय कहलकै, हमरो मॉन ठीक नै । बेटां कहलें छै हमरो रोग तभिये खतम हुवें पारै, जबें कि तोहें आपनों बहू के करेजों हमरा खाय लें दे । माय के बात सुनी कें बेटां आपनों बहू सें कहलकै, तोहरो नैहरा में उत्सव होय रैहलों छौं से तोहों आपनों नैहरा जा । हममें एक गो आदमी लगाय दै छियौं आरो सांय नें ओकरो साथें एक गो कसैया लगाय देलकै जे घनघोर बीजवन सें गुजरते ओकरा काटी कें ओकरो करेजों निकाली लेलकै । ऊ करेजों कसैयां ओकरो ससुरार पहुँचाय देलकै, जेकरा देखथें सास

२४ □ अंतहीन वैतरणी

हलफलाय उठलै आरो दलानी सें उतरी बेटा कें करेजों सें लगाय लेलकै । ठंड में ठुठरी कें काम करै वक्ती बच्ची कें रही-रही जतसौर के ई कहानी याद आबै छै । ऊ रही-रही बड़ी डरी जाय । बड़ी उदास होय जाय । मतरकि ऊ करौ की सकै छेलै । डोर-भय पीवी-पीवी बच्ची सोसराल में आपनों जिनगी के बोझ ढोना शुरू करलकै ।

:: ६ ::

जाड़ एकदम्मे उतरी गेलौ छेलै । एक दिन बच्ची पिछुवाड़ी के कुइयां पर सें नहावी कें लौटी रहलौ छेलै कि एक कोठरी में ससुर साहब कें आपनों पति सेमल सें बातचीत करतें देखलकै । शायद ससुरें बच्ची कें देखी लेलें छेलै, यही सें हुनी आपनों बातों कें ओकरा सुनाय लेली ही थोड़ों ऊँचों-ऊँचों करी कें कहना शुरू करी देलें छेलै । जैसे कि बच्चियो आपनों कोठरी सें सब बात सुनें सकें । जैसे कि बच्चियो आपनों कोठरी सें सब बात सुनें सकें । ससुर कहीं रहलौ छेलै,

—बेटा, आबें यहाँ रहना एकदम्मे ठीक नै । बिजनस एकदम ठप्प पड़ी रहलौ छै । प्लास्टिक कें जमाना आबी गेलै । है कांसा-पीतर के बरतन कोय खरीदै लै नै चाहै छै । सब कचकड़े के चाहै छै, गिरै तें टूटै नै । हेनो इस्थिति में ई जगघों छोड़ी कें कहीं दूसरे ठियां व्यापार करवों अच्छा ।

—तें की करलौं जाय ?

—तोहें एक काम करैं ।

—की?

—आपनों ससुर के पास जो आरो बचलौं गहना लै आव ।

—लेकिन हुनी तें कहलें छै कि ... ।

—हम्मं जे कहै छियौ करैं । पुतोहू के एक हार पाँच भर सोना के गछलें छै, ऊ लै लियें आरो बीस भर चांदी । कत्तो ना नुकूर करौं तोहें एक नै मानियें जादा कुछ कहौ तें कहियें हम्मं लड़की यहाँ लानी कें राखी देवौं तोहें जानियो आरो तोरो बेटी ।

बच्ची सबटा बात सुनी लेलकै । ओकरा समझे में नै आबी रहलौ छेलै कि वें की करतै ।

ओकरा आपनों बाबू के बारे में ख्याल ऐलै । है ठीक बात छै कि ओकरो बाबू कें टाका सम्पत के कमी नै छै, लेकिन अभिये अभी तें देश सेवा सें भी मुक्त होलौ छै । बाप रे बाप कत्तें-कत्तें रुपया निकाली-निकाली बाबू देश सेवा वास्तें दै देलकै । हम्मं पूछियै तें कहै बेटी, देश आजाद होय जैतै तें धौन के की कमी रहतै । धने-धन देश में होतै । इखनी तें सब धन इंगलिस्तान चल्लौ जाय छै । फेनू हमरौं तुरते शादी ।

शादी में कि नै करलकै बाबू आरो फेनू ई, तुरते तगादा ।

बच्ची कें आँखों में एक बारगिये आपनों ससुर आरो आपनों बाबू के तस्वीर ठामे-ठामे घुरी गेलै ।

—ओकरो आँखी के सामना जानकी बाबू के लोरैलौ आँख घुमें लागलै । आरो कानों में सम्पत बाबू के तेज-तेज आवाज । सम्पत बाबू कहलें जाय रहलौ छेलै ।

—जे गछलें छै, दैलें पड़तै ।

—मतरकि हमरा नैहियो दिये पारें । कैन्हें कि.... ।

कैन्हें उन्हें हम्मं कुछ नै समझे छियै । हुनका गछलौ जेवर दैय्ये लें लागतै नै तें बेटी उठाय कें लेलें जाव ।

—बाबू...सेमल आरो कुछ बोलतियै कि सम्पत बाबू बोली उठलै ।

—हम्मं कुछ नै सुनैलें चाहै छियै । बौकों बनला सें जिन्दगी नै चलतौ । डोर लागै छौ तें चलें हमरौं साथें । जे कहै छियो नी करना होतौं । आरो ठिक्के में ई कहि सम्पत बाबू सेमल के हाथ पकड़तें खाड़ों

भै गेलै आरो ओकरा सें कहलकै ।

—जो तैयार हो जो, ससुराल चलै वास्तें । दुलहिनो कें साथ चलै वास्तें कहैं । इखिनके गाड़ी पकड़ना छै । जरियो सा देरी करै के जरूरत नै ।

आरो ई कही सम्पत बाबू तैयार हुवेलें आपनों कोठरी दिश तेज-तेज बढ़ी गेलै ।

:: १० ::

द्वारी पर सम्पत आरो जानकी बाबू में गरमा गरमी बात हुवें लागलें छेलै । जानकी बाबू मुँह के पिरकी पिरक दान में फेंकतें हुवें कहलकै,

—की तोरा एतनौ हमरा पर विश्वास नै रहलें । जो हेने बात छै तें हमरा महिना भरी के मोहलत दा रत्ती-रत्ती भर बकाय-चुकाय देभौं ।

कोठरी के बाहर बच्ची मोखा लागी सब कुछ सुनी रहलें छेलै । आखरी बात सुनतें-सुनतें ऊ अनचोके सिसकी पड़लै । बेटी के कानबों जानकी बाबू के कानों में ऐलै तें हुनी बाहर निकली बच्ची के पीठ स्नेह सें थपथपैतें कहलकै,

—अरे तोहें कैन्हें कानै छौ बेटी । हाथ खाली होय गेलें छै, मतरकि कंगाल थोड़े होय गेलें छी । है बड़ों कोठी, जमीन-जायदाद आखिर कौन दिन काम ऐतै ? दूगो बारियो बेची देबै, हेकरै में तें ऋण कटी जैतै । कानै के की बात छै ।

फेनु जानकी बाबू थोड़ा मुसकैतें हुवें कहलकै,

—फेरु दुल्हा बाबू तें छेवे करै । हुनकौ सें बात करी कें देखै छियै । अरे समधी साहब नें हमरों दुख-दर्द नै समझलकै तें की, पौन्हों

नै समझतै । जमाय तें बेटे नांखी होय छै ।

आरो हेकरो बाद जानकी बाबू सेमलों से भी घंटा भरी बात करलें छेलै मतरकि नतीजा वही निकललै । सेमल नें बार-बार कहलें छेलै कि हम्में बाबू के मनो के विरुद्ध नै जावें सकौं ।

आपनों पति के हेनो बात सुनी के बच्ची के मॉन चूर-चूर होय गेलो छेलै । ऊ दौड़ी के छतो पर चढ़ी गेलै आरो एक कोना में बैठली आपनों माय के गोदी में मुँह राखी बच्चे नांखी फफकी-फफकी कानी पड़लें छेलै । कते देर तक माय चुप करतें रहलै आरो कते देर बाद बच्ची चुप भेलै ।

:: ११ ::

कल सेमल आपनों घोर जैतै । गछलों सोना-चाँदी के जेबर जानकी बाबू जेना-तेना ऊपर करी देलकै । घरों में कोइयो महाभारत नै होलै । रात होलै तें माय के बहुत मनैला पर बच्ची ऊ कोठरी में ऐलै जहाँ सेमल सूत के कोशिश करी रहलें छेलै । बच्ची के देखलकै तें वैं अनमैठलों भाव से कहलकै,

—बहुत रात होय चुकलें छै, सूती जा आरो हमरो सूतें दें ।

आरो सेमलें ई कही दोसरो दिश करवट बदली लेलकै । बच्चियो एतें दुखी छेलै कि कुछुवो उत्तर नै दै के चुपचाप बिछावन के एक कोरी में सूती रहलै । मतरकि ओकरा नींद नै आबी रहलें छेलै । नींद ऐबौ करतियै केना ? वैं आपनों पति के स्वभाव के बारे में कते-कते सुन्नर भाव सजैलें छेलै । मतरकि सब कपूर बनी उड़ी रहलें छेलै ।

ओकरा हेने बुझाय रहलें छेलै जेनाकि ऊ बकरी-छकरी रहें,

२८ □ अंतहीन वैतरणी

जेकरा कसाय के खूटा में कोय बांधी देलें रहें । आबें ओकरो जिनगी में खुशी नै आबें पारें सकें । बस इंतजार करौ चुपचाप मौत के आवै के । बच्ची कें यही लागी रहलें छेलै कि आबें मेमियैलों सें कोय फायदा नै ।

सोचतें-सोचतें आधों रात गेलै कि तखनिये वैं अनुभव करलकै, एक हाथ ओकरो गल्ला पर धीरे-धीरे रेंगी रहलें छै । एकबार तें ओकरो मॉन होलै कि जोर सें चीखी पड़ें । पर कुछ सोची कें दम साधलै रहलै ।

आखिरी केकरो हाथ हुवें पारें ? कोठरी तें एकदम्मे बन्द छै । बाहरी आदमी घुसै के कोय सवाले नै छै । जरूर ओकरे पति के हाथ छेकै । बच्ची ई सोची एकदम निश्चिन्त बनलें रहलै । एकदम इस्थिर । हेने जेनों सेमल कें बुझावें, ऊ एकदम घोर नींदों में छै ।

है की ? बच्ची डिबिया के बुझलें-बुझलें रोशनी ने देखलकै कि ओकरो हार खोललें जाय रहलें छै । वैनें आपनों आँख फाड़ी कें ऊ हाथ पहचानै के कोशिश करलकै । एकदम सेमल के ही हाथ छेलै । बच्ची समझै नै पारी रहलें छेलै कि ओकरो पति आखिर कैन्हें ओकरो गल्ला सें हार खोली लेलें छेलै । ओकरो मनो में कतें-कतें नी शंका उठलें छेलै मतरकि पत्नी होय के लोक-लाज के कारने ऊ कुछुवो नै बोलें पारलै । चुपचाप आँख मूनी लेलकै आरो मुनले आँखों सें ई सब कुछ भूली जाय के बिहान तक कोशिश करतें रहलै ।

बिहान होथें सेमलें बच्ची सें कहलकै,

—हमरो जायके तैयारी करो ।

—....

—सुनलौ नै, की कहलियों ? सेमल के आवाजों में रुखाई छेलै ।

—कैन्हें, आजो भरी नै रुकें पारों ? बच्चीं बड़ी नम्रता सें कहलकै ।

—आज भरी की, एक्को पल लेली हमरो रुकना मुश्किल छै ।

—तें हम्मू साथ चलभौ ।

—तोहों वहाँ जाय कें की करभा । अभी यही रूकों बादों में जहियों ।

—है हरगिज नै होतै । हम्मों साथे जैबों ।

—जादें जिद करला तें बुरा परिणाम होतों ।

—जे होतै से होतै; जैभों साथे । शादी के बाद आबें हमरा ई घरों सें की लेना-देना । आबें तें वही घोर हमरों घोर छेकै जे तोरों छेकों । हमरों सास-ससुरों हमरों माय-बाप आरो तोंही हमरों प्राण-देह-सबकुछ ।

—है दरशन-वरशन अपने पास रक्खों आरो हमरों जाय के तैयारी करों ।

बच्ची बहुत हाय-तौबा मचैलकै मतरकि सेमल ओकरा नैहरे में छोड़ी वहाँ सें वही दिन, वही समय निकली गेलै । बच्ची दिन भर आँखी में लोर लेलें कपसतें रहलै । कै दिन कपसतै रही गेलै ।

:: १२ ::

—बेटी तोरों गल्ला के हार ?

जानकी बाबू बच्ची के सुन्नो गल्ला देखी पूछलकै । मतरकि बच्ची चुप्पे रहलै । शयद जानकी बाबू कें सब्भेटा समझै में देरी नै लागलें छेलै आरो हुनी कहलकै,

—बेटी, हम्मों चाहै छियै कि दुल्हा बाबू कोय नौकरी-औकरी करी लौं तें अच्छा । जो तोहें कहों तें हम्मों बातचीत करियै । हमरों सम्पर्क के एगो अधिकारी छै । केन्हों नै केन्हों नौकरी में लगैये देतै ।

बाबू के बात सुनथें बच्ची के चेहरा पर चमक दौड़ी ऐलें छेलै ।

—तें ठीक छै, तोहें दुल्हा बाबू कें खबर करी दै । आपनों

मैट्रिक वाला सर्टिफिकेट-उर्टिफिकेट लै आनौ । हमरा मालूम भेलों छै, स्वास्थ्य विभागों में बहाली होय वाला छै आरो हमरों साथी वही विभागों के आफिसर भी छेकै ।

ई कही जानकी बाबू ऊपर चल्लों गेलै । बच्ची सेमल कें चिट्ठी लिखलकै । जल्दिये सब कागज लै कें चल्लों आबै लें । आरो ई देखी कें घरों में सब्भे कें बड़ी खुशी आरो आचरजो भेलों छेलै कि सेमल तीने रोज के बाद भागलपुर चल्लों ऐलों छेलै ।

बच्ची कें बड़ी खुशी होय रैल्लों छेलै कि सेमल के जिनगी आबें व्यवस्थित होय जैतै आरो ऊ एक कमाऊ पति के पत्नी बनी जैतै । ओकरों मौज-शान सब पूरा होतै । पैसा रुपया कें अभाव में नी ओकरों पति.... ।

बच्ची कें आपनों ऊपर गुस्सा आबी गेलै कि कैन्हं वें आपनों पति के बारे ऊ सब सोची लै छै जे सेमल कें चरित्र कें छोटों बनाय छै ।

पति के तें पत्नी के हर चीजों पर अधिकार होय छै । तन-मन-धन सब पर, आरो पत्नी के कर्तव्य होय छै, आपनों पति कें सब कुछ मनों सें समर्पित करें । वें आपना आप कें समझैलकै आरो सबकुछ भुलाय कें खुश दिखै के कोशिश करै लागलै । बस एक्के बात याद करै कि ऊ नौकरिया पति के पत्नी बनतै ।

बच्ची कें आबें ऊ गीत बड़ी याद आबें लागलें छेलै जै मैं एक पतोहू कें मेला देखै लेली सास-ससुर-देवर-जेठ-नन्दौसी-ननद केकरों-केकरों पास नै जावै लें लागलें छेलै आरो के नै ओकरा पैसा दै मैं दुरदुराय देलें छेलै । जेकरों पति कमाऊ होतै ओकरा कथी के दुख !

मतरकि बच्ची के सब सपना कटलों डारिये रं हरहराय कें गिरी पड़लै । सेमल ठीक समय पर इन्टरव्यू पर जाय के बदला आपनों घोर चली देलकै । जानकी बाबू के सब करला-धरला पर पानी फिरी गेलै । पढ़लें-लिखलें के कोय खास सर्टिफिकेट नहियो रैल्ला के बादो जानकी बाबू नें आपनों लाग-लुग सें सेमल के नौकरी पक्की करी देलें छेलै । मतरकि भगवानें बच्ची के भागों में कमाऊ पति नै लिखलें छेलै ।

माय-बापू साथें बच्चियो आपनों माथों धुनी लेलकै । कै रोज तक वैंने दुक्खों सें नै खेलें छेलै । तेसरो दिन माय-बाबू के कर्ते मनैला पर वैंने कौर मुँहों में देलें छेलै ।

:: १३ ::

—तें दुल्हा वास्ते की सोची रहलौ छौ ।

बच्ची माय बड़ा दुखलौ मनो सें पुछलकै ।

—आबें आरो की सोचलौ जाबें सकै छै । बच्ची के कहला पर हम्मैं छड़ों के गोलो हुनकों लेली दैलें तैयार छेलियै । सोचलियै कि व्यापार में लाख रुपया सालाना कमाय लै छै तें की कम छै । मतरकि दुल्हा कें वहू पसन्द नै होलै । आबें तें हमरा एक्के बात जँचै छै कि बच्ची कें केन्हौं पढ़ाय-लिखाय देलौ जाय आरो होकरे भविष्य बनाय वास्ते सोचलौ जाय । दुल्हा बाबू के मिजाज कें समझना हमरों लेली मुश्किल छौ ।

जानकी बाबू उदास स्वरो में कहलकै,

—ई बारे में बच्चियों के मोन जानी लेलौ जाय ।

—केन्हें नी, अभी बेटी कें बुलाय छियै

आरो जानकी बाबू हांक लगैलकै । हांक सुनथैं बच्ची ६ ङफड़ैलौ बाबू के पास दौड़ी चल्ली ऐलै ।

—की कहै छौ ?

—बैठौं बेटी, तोरा सें एगो बहुत जरूरी बात करना छै । हम्मैं चाहै छियै तोहें अबकी आई. ए. के परीक्षा में बैठी जा । बैठलौं-बैठलौं हेनौ कें तोरा मोन नै लागतें होतौं । फेनू पढ़ना-लिखना जिनगी लेली कर्ते जरूरी छै, है तोरा सें बताय के जरूरत नै छै ।

३२ □ अंतहीन वैतरणी

परीक्षा आरो पढ़े के बात सुनथें बच्ची के लागलै जेना ऊ खुशी से नाची पड़तै । ओकरो चेहरा पर अनचोके घन्नों खुशी के प्रकाश पसरी गेलै । खुशी में ओकरो मुँहों से बस एतनै शब्द निकललै;

—बाबू !

आरो वही खुशी में ऊ फुर से फेनू छत्तों पर भागी गेलै । बच्ची के लागी रैल्हों छेलै जेना ओकरा गोड़ों में हजार पायल बंधी गेलों रहें जेकरा से एक्के साथ संगीत फुटी पड़लें रहें । ओकरो मॉन होय रैल्हों छेलै, रात-रात भर बैठी के गीत गावें, रात भर नाचतें रहें ।

रात भर बैठी के ऊ कत्तें कत्तें बात सोचतें रहि गेलों छेलै ।

—ओकरो पति ई बातों से बड़ी खुश भेतै । हुनियो तें साहित्य के बड़ी प्रेमी छै । निराला, नेपाली, नीरज आरो नै जानौ के एक कवि के कविता जोगाय-जोगाय के राखलें होलें छै । खाली समय में उठाय के पढ़ै छै । गुनगुनाय छै । जबे हुनका ई मालूम होतै कि हमरो पढ़े के सिलसिला शुरु होय गेलों छै तें कत्तें खुश होतै । जरूर हमरा साथे-साथे पढ़ना शुरु करी देतै । आरो फेनू हुनको साथे हम्मू अध ययनरत रहि ढेर-ढेर जानी लेबै । एम. ए. तांय पढ़ी लेबै ।

आरो वही रातों से बच्ची पढ़े में डूबी गेलों छेलै, दिन-दिन, रात-रात । जानकी बाबू के खुशी के तें कोय ठिकानों नै रहि गेलों छेलै ।

:: १४ ::

सम्पत बाबू के किस्मते में शायद आबें व्यापार नै लिखलें छेलै । सेमल के ससुराल से लानलें सम्पत्तियो से दुकान दौरी में कोय सुधार नै हुवें पारलै । आरो सेमल के तें स्वभावे अलग होलें जाय रैहलें छेलै । नै दुकान देखना, नै घोर-गृहस्थी । चुपचाप साथी-संगी के

अंतहीन वैतरणी □ ३३

साथें बैठी तास के पत्ता फेकवों, यही आकरोँ दिनचर्या बनी गेलों छेलै ।
कभी आपनों दुआरी पर तें कभी दूसरा के घरों पर ।

एक दिन सम्पत बाबू के पुरानों दोस्त जागेसर नें हुनका सें
आबी कें कहलकै ।

—सम्पत, तोंय आपनों बेटा सेमल कें कहीं दूर भेजी दें, बाहर
रहला पर बुद्धियो खुलतै । यहाँ रहला सें तें सेमल के चरित्रो गड़बड़ाय
रहलौ छै ।”

—से की ?

सम्पत बाबू के चेहरा पर अनचोके चिन्ता आरो आश्चर्य के
भाव उभरी ऐलौ छेलै ।

—आबें की कहियोँ सम्पत, अनसिया के बेटा के साथें सेमल
के जोन रं के बात-व्यवहार चली रहलौ छै, हेकरा सें तें तोरोँ कहीं सें
इज्जत नै रहैवाला छौं । अनसियो बेटा के चाल-सोभाव तें विख्याते छै ।
समय रहते सेमल कें संभाली ले सम्पत, नै तें कन्हौँ मुँ दिखाय लायक
नै रही जैबे । हमरोँ मानें तें सेमल के कनियांय कें ओकरोँ नैहर सें
बुलाय कें यहीं रखी ले । बिहैलौ बच्चा-बच्ची कें अलग-अलग जादा
दिन रखना सें चाल-चलन बिगड़वे करें । फेनू कनियांय यहाँ रहतै तें
सेमलो के चरित्र पर अंकुश लगैतै ।

सम्पत बाबू के मुँहों सें एक्को आखर नै निकललै । यहाँ तक
कि जागेसर उठी कें चल्लों गेलै तभियो नै । है की होय रहलौ छै ? हुनी
मनेमन सोची कें व्याकुल होलौ जाय रहलौ छेलै—“नै, नै हम्में कनियांय
के नैहरा छोड़ी अच्छा नै, करी रहलौ छियै । आरो हुनी आपनों मंजलका
बेटा कें आवै के हाँक लगैतें चिट्ठों लिखैलें बैठी रहलौ ।

कत्ते कोहराम मचलों छेलै जखनी बच्ची कें लै जाय वास्ते ओकरों दियोर दुआर पहुँचलों छेलै । बच्ची माय तें साफ इनकार करी देलें छेलै, “नै-नै बच्ची बेटी आबें यहाँ सें नै जैतै । जब तांय ओकरों जिनगी नै बनी जाय छै । इखनी लै जाय के मतलब छै कि ओकरों साल भरी के पढ़वों-लिखवों सब खतम । समधी जी बुरा मानौ या भला । मतरकि बच्चिये जाय वास्ते आखिर में तैयार होय गेलों छेलै । वैं माय कें बड़ी मुश्किल सें समझाय-बुझाय कें हेकरो वास्ते तैयार करलें छेलै—“माय, बेटी जिनगी भर वास्ते आपनों माय-बाबू के घरों पर रहै पारलों छै ? बेटी के किस्मते परदेश वास्ते बनलों छै । फेनू कहिया तक हम्मैं आपनों ससुराल सें आपनों पिंड छुड़ाबें पारों । किस्मत के बनवों बिगड़वों आबें हुनिये सोचतै, हुनकै सोचै के अधिकार छै । कहीं है विरोध करला सें हमरों भविष्य आरो नै खराब होय जाय । यही लें हमरा जावें दें । हमरा रोकै के मतलब छै, हमरों दुर्भाग्य कें बुलैवों ।” आरो बच्ची के ई सब बात सुनी कें ओकरों माय ओकरों बिदाय वास्ते तैयार होय गेलों छेलै ।

मतरकि बच्ची के ससुराल ऐला सें कोय स्थिति बदली गेलों रहै हेनों बात नै होलों छेलै ।

ससुराल के आर्थिक स्थिति जे गिरी गेलों छेलै, ऊ दिन-दिन आरो गिरते चल्लों गेलै । हेने लागी रेल्लों छेलै जेना घरों पर एक्को फूस नै रहि जैतै । खाना-पानी हेनों भै गेलै कि बच्ची के मुँहों में नै राखलों जाय । कै-कै दिन तें ऊ पानियो पीवी कें रहि जाय । जोन दिन हेनों हुवै ऊ दिन बच्ची कें कोय खैइयों लें नै पूछै । शायद घरों में पूछै लायक अन्नो नै रहै । दिन बीततें चल्लों गेलै । महिना, वर्ष । वर्ष पर वर्ष । तीन वर्ष बीती गेलै ।

एक दिन सेमल बड़ी उदास होय कें बच्ची के पास ऐलै । बच्ची के जिनगी में शायद ई पैहलों दिन होतै जबें ऊ सेमल सें पति के

आत्मीयता पैलें होते । बच्ची धीरें सें ओकरो नगीच बैठतें हुवें पूछलें छेलै ।

—आय तोरा बहुत उदास देखै छियौं । की बात छेकै ?

—आबें तोरा से की बतैइयौं । चाहै छेलियै, आपनों घरों के कुछुवे बात तोरा सें नै कहियौ, मतरकि छुपैलों सें आवें कुछुवे नै छुपैवाला छै । नै जानौं भगवान एतें कुपित केन्हें भै गेलों छै । एक्को कदम नै संभलें दै छै । महिना भरी होय गेलै, एगो चाय के दुकान खोल्लों छेलियै, वहू बैठी गेलै । आबें तें जेना लागै छै... ।

कहतें-कहतें सेमल के बोली एकदम रुआंसा होय गेलों छेलै ।

—तें हेकरा में घबड़ावै के की बात छै, हम्में आपनों बाबू सें बात करै छियै । हुनी जरुरे कुछु न कुछु व्यवस्था करतै । हम्में आपनों बाबू कें जानै छियै ।

आपनों देश से आपनों बेटी के कम नै मानलें छै ।

—मतरकि तोहें हेनों स्थिति में जैभौ केना ? लोगें कि कहतै । दूजीवियों हालतों में वहाँ नै राखी कें नैहर पहुँचाय देलकै । घरों में राखै-पोसै के स्थिति नै होतै तभियो तें ।

एकदम हेनों बात नै सोचों । माय-बाबू हमरा देखी एतें खुश होतै कि कैहलों नै जाबै सकें छै । हम्में आपनों कोखी में पली रहलों बच्चा पर हाथ रखी कें कहै छियौं, हम्में यहाँकरो एक्को हालत वहाँ नै कहवौं ।.....लोग कहै छै जनानी के पेटों में बात नै पचै छै, तोहें यही डरों सें डरी नै जइयौ ।

ई कही बच्ची बहुत हल्का मुस्कैलों छेलै ।

—सुनों, हमरों तरफ सें तें कोय मनाही नै छै, जरा बाबू जी सें पूछै लें लागें हुनी शायद हेकरा पसन्द नै करै । तोहें तें जानभे करै छों कि हमरों-तोरो बाबू में खींचातानी भै गेलों छै । जों बाबू-माय नै चैहतौं तें हमरों चाहतौं हम्में तोहरा नैहर नै भेजें सकौं । हम्में माय-बाबू के विरुद्ध नै जाबें सकौं ।

—तें माय-बाबू कें केन्हों मनावों नी ।

—हम्में कोशिश नी करें पारों, मॉन तें बाबुवे माय के रहतै ।
आरो ई कही सेमल उठी कें बरान्डा दिस चली देलें छेलै, बाबू
सैं बातचीत करै लें ।

बारह बजे रात तांय बच्ची आपनों कोठरी में बैठलों-बैठलों
दुआरी दिस आँख गड़ैलें रहलें कि आबें सेमल ऐतै, आबें सेमल ऐतै ।
मतरकि ऐलै तबें जबें बिहान होय चुकलों छेलै । बच्चियो कहाँ सुतलों
छेलै । देखथें उठी-बैठी गेलै ।

—की कहलकों ?

बच्ची के स्वर में काफी उदासी छेलै । सेमलें एकबार बच्ची कें
एक अजीबे नजरी सें देखलकै आरो फेनू चुपचाप कोठरी सें बाहर
निकली गेलै बिना कुछ कहले ।

बच्ची कें सब्भेटा बात समझै में कुछुवो देर नै लागलै । वैनें
आपनों बितलों अनुभव के आधार पर सबटा आदि में अन्त तक जानी
लेलकै आरो फेनू चुपचाप खाड़ी भै गेलै, घरों के सबटा काम निपटाय
लें । फरचों होला के बादे बच्ची कें बिछावन पर नै देखै लें चाहै छै ।
जरियो देर होतियै कि नानी माय लगाय कें की-की नी कही बैठतियै से
बच्ची तुरत्ते उठी खाड़ी होय गेलै आरो ओसरा पर आबी गेलै । बाहर
कोय नै छेलै । सब्भे आपनों बिछावन पर होतै, नींदो में विभोर या
आलस में डूबलों । बच्ची आपनों कोखी दिस एक बार देखलकै । नौ
महिना सें ऊपर होय ऐलों छेलै यहू हालतों पर घरों के काम बच्ची के
ठोरों पर एक घृणापूर्ण हंसी फूटी गेलै ।

:: १६ ::

—माय, तोरा सिनी कें होय की गेलों छौ । लाज बीज एकदम
अंतहीन वैतरणी □ ३७

धोय-धाय कें पीवी गेलों छें की ?

कमलें माय पर बरसतें हुवें कहलकै । कमल सेमल के मंझलका भाय छेकै । आपनों पत्नी साथें आपनों ससुराले में रहै छै । आय चार वर्षों पर घोर ऐलों छेलै ।

बच्ची के शादी पहलें कमलें सें लागी रैल्हों छेलै । पंडितें बतैलें छेलै, कन्या के राशि योग सेमल सें नै कमल से बैठै छै । मतरकि बड़का भाय कुमारों रहतियै आरो छोटका के बीहा, है केना कें हुवें पारै छेलै । से बच्ची के शादी सेमल सें होय गेलै ।

बच्चियो कें मालूम छै कि कमल आपनों गुणों आरो स्वभावों में कोय्यो भाय सें बहुत उच्चों छै । घरों के लोगों सें पटरी नै बैठला के कारण घोर छोड़ी ससुराल बसी गेलै आरो घोर आन्है छोड़ी देलकै । कमल के देखा-देखि निर्मलो । घरों में खाली सेमले रहि गेलों छेलै, माय-बाबू के श्रवण बनी कें ।

आय चार वर्षों के बाद कमल घोर लौटलों छै । घरों के जे स्थिति छेलै छेवे करलै, मतरकि भौजाय के देहों पर फटलों लुंगा देखी के ओकरों छाती-फाटी ऐलै ।

बच्ची हेनों साड़ी में कमल के सामना आवैलें नै चाहै छेलै । वैनें कमल कें बातो करै लें नै बुलैलें छेलै । कमल आपने ओकरों कोठरी में घुसी ऐलों छेलै आरो ओकरा आपनों भांगलों साड़ी सें देहों कें छिपैतें देखी कें तड़पी उठलों छेलै ।

मतरकि हेनों भाव रचलें छेलै जेना कि ओकरों नजर भांगलों लुंगा पर पड़लें नै रहें ।

—की भाभी, हमरा पर तोहें गुस्सैलों छौ की ? हमरों ऐलों तीन घंटा होय गेलै, आरो हमरा तोहें बुलैलों तक नै ।

—ई जानै लें कि अभियो हमरों देवर हमरों रहि गेलों छै कि नै ?”

—भाभी, तोहें नैहर केन्हें नी चल्लों जाय छों, यहाँ दम घुटैला सें की फायदा ।

—दम कथी लें घुटतै दियोर ?

बच्चीं आपनों ठोरों पर हल्का हंसी लानतें कहलें छेलै ।

—बनावटी हंसी नै आनौ भाभी हम्में तीन-चार घंटा में सब कुछ जानी लेलें छियै । तोहें ई घरों के बारे में की जानभौ । हम्में जानै छियै । यहाँ खाली रूपया-पैसा के पहचानलों जाय छै, आदमी के कीमत यहाँ कुछुवो नै छै । हम्में कहै छियै, तोहें ई हालतों में यहाँ नहिये रहौ तें ठीक ।

—मतरकि माय-बाबू घोर जाय सें मना करलें छै ।

—माय-बाबू मना करैवाला के होय छै । चलौ हम्में तोरा नैहरा पहुँचाय दै छियौ । ठहरौ, भैया सें बात करै छियै ।

आरो कमल कोठरी सें गुस्सा में बाहर निकली ऐलों छेलै । कमल के आत्मीयता पावी के बच्ची कुछ क्षणों वास्ते एकदम निहाल होय उठली छेलै । वैं मनेमन आपनों भाग के कोसलों आरो कमल के स्वभावों के सरैल्लें छेलै, कतें अच्छा होतियै जों कमल सें हमरों बीहा होलों होतियै । कतें दावा आरो प्रेमों सें बात करै छेलै जेना ऊ हमरों पति रहें । है रं के बात सोचथैं बच्ची एक अनचिन्हों सुखों सें भरी गेलों छेलै । बस एक्के गूज ओकरो मनो सें लैके दिमागों तक गुंजतें रहलै । कतें अच्छा होतियै कि कमले ओकरा जिनगी में ऐतियै । शील स्वभाव के कतें धनी छै कमल ।

आरो ऐंगन में कमल के आवाज गुंजी रहलें छेलै ।

—लागै छै, भाभी घरों के बहू रहें ? नौड़ी बनाय के राखी देलें छै ।

—बड़ी हमदर्दी होय रहलें छै । एतनै दया छौ तें साड़ी कैन्हेंनी कीनी के दै दै छें ।

ई कही गुस्सा में कमल माय उठी खाड़ी भै गेलै आरो झनझनैतें एक ओर चली देलकै ।

—अजीब है घोर होय गेलों छै । आचरज होय छै कि हेनों माहौल में भाभी बची केना रहलें छै । पत्थर कलेजावाला घुटी के मरी

जाय ।

एतना कही कमल फेनू बच्ची के कोठरी में चल्लों ऐलै आरो थोड़ा नरमैतें हुवें कहै लागलै—भाभी, उठों । यहाँ एक्को पल लेली ठहरना बेकार । तोरों तैयार होतें-होंतें भैयों आबी जैतै । नैहियों ऐतै तें कुछ नै होय छै । हम्मों बादों में हुनका मनाय लेबै ।

—अरे, तोहें व्याकुल कैन्हें होय रहलों छै । स्थिर हुवें तें ।..
. हमरा यहा पर की दुख छै जे हम्मों माय-बाबू के किंछा के खिलाफ यहाँ से मनमुटाव करी चली देवै । नै नै दियोर, हेनों नै करवाबों । हमरों साथें तहूँ बदनाम होवा । लोगें यही कहतौ कि भाभी दियोर उड़ारी लै भागलै ।

बच्ची हँसतें हुए कहलकै आरो कमल कें दुलार सें खटिया पर बिठैतें मुस्काय-मुस्काय कें कहना शुरु करलकै,

—एक बात कहियों दियोर, हमरा जों कुछ दुख आविये गेलों छै तें हेकरा में गोस्सावै के कोय बात नै । है कैन्हें नी समझै छौ कि हमरा पर ई दुख परिवार पर पड़लें दुख के कारने नी छै । आय जों घरों के आर्थिक स्थिति ठीक होतियै तें की समझै छों, हमरों देहों पर भांगलें लुंगा होतियै । आय हम्मों ई दुखों सें घबड़ाय कें जों नैहर चली दे छियै तें लोगें हिनस्ताय करें नै करें । हमरों मोन तें हमरा धिक्कारतें रहतै । ...हम्मों समझै छियै कि हमरों दियोर हमरा बड़ी मानै छै । एतें मानै छै कि जेना... । मतरकि विपत्ति में सबर धरलें से आदमी कहाय छै । हम्मों तें चाहवै कि हमरों दियोर देवता रं हुवें । आखरी कुछ शब्द कें कहतें-कहतें बच्ची के जी जेना लड़खड़ाय गेलों छेलै । ओकरा लागलै कि जेना ऊ कुछ दूसरे बात कहै लें चाहै छेलै आरो दूसरों बात कही गेलै । मतरकि आपनों स्थिति पर काबू पैतें तुरन्ते बच्ची कहलकै,

—की दियोर, तोहें के देवता नै बनै लें चाहै छों ?

कमल भाभी के बातों के कुछवो उत्तर नै दियै पारलकै । टुकुर-टुकुर भाभी के आँख में झांकतें रहलै । कतें प्रेम छै वै आँखी में कतें करुणा । कमल कें लागलै जेना ऊ वै प्रेमों के धार में बही जैतै ।

—अरे तोहें चुप छों, कुछ बोलै नै छौ ।

—आबें हम्में की जवाब दियों भाभी । तोहें सचमुचे में बहू के रूपों में देवी घोर ऐली छौ । फेनू देवी के ई दुख । की लेली यहू माय कही के टाली देलों जाय ।”

—तोहें बहुत भावुक बनी गेलों छों । हम्में है कहाँ कही रहलों छियौ कि हम्में तोरों साथ नहिये जैबौ । एकदम जैवों । पहलें आपनों कनियांय के यहाँ लानों । अकेल्ले अकेल्ले ऐलों छों हमरा उड़ारे लें । मरद केन्हों ।

बच्ची के बात सुनी कमल मुस्की पड़लों छेलै । नै चाहतें हुवें ओकरो ठोरों पर एक मुस्कान खिंची ऐलों छेलै । आरो फेनू अनचोके गंभीर होतें हुवें कहलें छेलै,

—ठीक छै भाभी, जाय छियौ आरो जल्दिये रेखा साथें आवै छियौ । तोरा ई नरकों सें हमरा जेना होतै, निकालनै छै ।

आरो ई कही कमल कोठरी सें निकली, एंगन होतें घरों सें सीधे बाहर होय गेलों छेलै । बच्ची हाथों से रोकतै रहि गेलै लाजों सें हांक नै दियै पारलकै ।

:: १७ ::

बच्ची के लड़की होलै । आय लड़की के छट्ठी छेकै । पर घोर हवांक लागी रहलों छै । सोरी घरों सें निकलला के बाद सास एक्को बार बच्ची के देखे वास्तें नै ऐलै या ओकरो दुख जानै वास्तें । बुतरु के छाती सें सटैलें बच्ची यही सपना देखतें रहै छै, जानकी बाबू के कोठी में आय अनदिने होली आरो दीवाली एक्के साथ मनैलों जाय रहलों छै । घरों के खिड़की-खिड़की सें आवाज छनी-छनी के बाहर तांय आवी

रहलौं छै,

आजु सुमंगल दायक, सब विधि लायक हे
ललना रे जनमल होरिला, आनन्द मन छायल हे
दुअरे बाजै बधावा ऐंगना आवै सोहर हे
ललना रे राजा दशरथ के मन भेलै हुलास
नौबत झरै हे ।

जानकी बाबू आरो हुनको पत्नी के खुशी के कोय ठिकानों नै
रहलौं छै । घोर के बाहर मंगनिया के भीड़ लागी गेलों छै आरो बाबू
कपड़ा अन्न दै में कोय कमी नै करि रहलौं छै,

होरिला के सुनी कें जनम, उदाह भेलै हे
ललना रे मांगै इनाम, से लिए घर जैबे हे
वसन आभूषण सब पावन मन हुलसाल हे
ललना रे होरिला कें दै आशीष हरीष गुण
गावन हे

...सपना देखी-देखी बच्ची के मन होय छै जेना ऊ लड़की कें
अंचरा में समेटी सीधे नैहर भागी जाय । ओकरा ई सोची बड़ी दुख होय
छै कि घरों में पैहलें टा सन्तान होलौं छै आरो कोय्यो खुशी नै । लागै
छै जेना सन्तान नै होलौं रहै, घरों में कोय लाश निकली गेलों रहें ।
बच्ची कें आँख में लोर भरी ऐलै । मतरकि ऊ ठोर बांधी चुप्पे रहलै ।
टुकुर-टुकुर बेटी के मुँह देखते रहलै जेना मांय से कहतें रहें, “माय तोहें
ऊ हमरों वास्तें दुखित कैन्हें छैं । हमरा यही स्थिति सुख दै छै । जबें
तोंही एतें दुक्खों से जिनगी काटी रहलौं छै तें हमरों छट्ठी पर एकदिन
खुशिये मनैला से की ?” बच्ची आपनों बेटी के छाती से सटाय लेलकै
आरो एक पल चुप रहला के बाद टुटलौं-टुटलौं स्वर में गावै लागलै,

मचिया बैठलि मातु कौशिला बालक मुख निरखत हे
ललना रे मोरा बेटा प्राण के आधार नैन बीच राखव हे ।

बच्ची के बेटी जों-जों बढ़लो गेलै, बच्ची वास्ते घर स्वर्ग बनते चललौं गेलै । नाना नाम राखलें छेलै—रजनीगंधा । ठीक नामे हेनो रजनीगंधा के रूप आरो गुण । गोरी-लारी हेने जेन्हो जगदम्बा बच्ची के रूप लै जन्मलौं रहें । दिनभर फुदकते गैते रहें ।

बच्ची के माय-बाबू आरो नानी समधियारो ऐलो छै बच्ची आरो ओकरो बेटी के देखै लें । खाना-पीना आरो सोना, सब एक होटल में करी लेलें छेलै । रजनीगंधा के कते-कते सोना-चांदी कपड़ा देलें छेलै नाना-नानी आरो परनानी । आरो फेनू दस रोज बाद भागलपुर लौटी ऐलो छेलै ।

बच्ची नै जानलकै कि ओकरो माय-बाबू आरो नानी ओकरा-ओकरो बेटी के की देलकै । जानै के कोशिश नै करलकै । दस रोज तांय माय-बाबू नानी यहाँ आबी के रहलौं यही ते ओकरो वास्ते अगाध हर्ष के बात छेलै । जेना ओकरा इन्द्रासन के सम्पत्ति मिली गेलौं रहें ।

तीन वर्ष तक बच्ची यही खुशी में डुबलौं रहलै आरो देखथें-देखथें रजनी गंधा तीन वर्षो के होय गेलै ।

रजनीगंधा बच्ची के पीछू-पीछू लागलें रहें । कभियो कुछ लें जिद नै करै, बस एक्के चीज छोड़ी के कि तुलसीदल हमरा सबसें पहलें दे । बच्ची रजनीगंधा के ई स्वभाव पर आश्चर्यचकित छेलै । बच्चे से ई धार्मिक हाव-भाव । रजनीगंधा के ई स्वभाव देखी-देखी बच्चियो भगवान के भक्ति-भाव में डूबते चल्ली गेलै । बीती गेलै छौं महिना आरो ।

एक दिन अनचोके रजनीगंधा के मिजाज बिगड़ी गेलै । तबीयत खराब भेलै ते भेलै चल्लो गेलै । मतरकि रजनी के मूँ पर परेशानी के कोय भाव नै उभरै । बच्ची देखी रहलौं छेलै कि ऊ आबे बोलै-चालै कम छेलै । बोलै-चालै ते पैहलो रजनी कम छेलै, आबे आरो कम होते गेलौं

छेलै । बस बोलै तें तुलसीदल चाहै लें ।

बच्ची कें समझै में आबै लागलै कि हमरों बेटी नै बचती । दिन-रात ऊ ओकरे पास बैठलें रहै । कुछ सें कुछ बतियैते रहै आरो रजनी माय के मूँ टुकुर-टुकुर ताकतै रहै, नै तें आँख प्रायः मुनलें राखै । कभी-कभी माय सें बतियावै तें बस रुकी-रुकी यही बोलै ।

चलों चलों माँ सपनो के गाँव में

काँटों से दूर कहीं फूलों की छांव में ।

रजनी जहिया सें बोलना सिखलें छै, यही गैतें रहै छै ।

बच्ची कै बार रजनी के बदतर हालत के बारे में सास-ससुर कें खुली कें बताय चुकलें छै । मतरकि कोय ध्यान नै देलकै सास-ससुरें । कै बार पतियो कें गोड़ पकड़ी कानी-कानी कहलें छेलै, कोय अच्छा डॉक्टरों सें रजनी के इलाज कराय लें । मतरकि सेमलों यही कही टारी देलें छेलै ‘रजनी कें होलै की छै । रुत बदलला पर मॉन-तॉन खराब होइये जाय छै । कुच्छू दिनों में तबियत ठीक होय जैतै । यही लें डॉक्टरो के पास रुपया फेंकी ऐवों कोन बुद्धिमानी होतै । तोहें औरत जात, हेने घबड़ाय जाय छों ।आरो एक बात कही दै छियों, हमरा है इलाज-फिलाज वास्तें रोज-रोज हुरकुचलों नै करों, नै तें एक दिन गुस्सा में धुनाटी देवौ ।’

बच्ची चुप होय गेलों छेलै । एकदम चुप, जेना रजनी होलों जाय, रहलें छेलै । आपनों जीवन कें रजनी के रंग-ढंग में मिलैलें चल्लों गेलै मूँ में मिसरी आरो तुलसी के दस-पन्दरह दल लै कें रजनी के नगीच बैठी रहें । रजनीगंधा के एक दिन आँख पथराय गेलै । ओकरो मूँ जरा सा खुललै, बच्ची दौड़ी कें गंगा नीर लै आनलकै, मूँ में चम्मच सें नीर डाललकै । रजनी के मूँ में अभियो भोरके लेलों तुलसीदल हरा बनलों सटलों छेलै । बच्ची के हाथों आरो आँखी के नीर एक साथ भोवाय पड़लै । मतरकि ऊ कानलै नै तैहियो नै, जबें कि रजनीगंधा के शांत शरीर सफेद कपड़ा में लिपटाय कें घरों सें बाहर निकाललों जाय रहलें छेलै ।

दू साल बाद ।

जानकी प्रसाद करीब पन्द्रह लोगों के साथ बच्ची के ससुराल पहुँचलै । हुनी कोय रं से ई वास्ते तैयार नै छै कि बच्ची नैहर नै जैतै । 'तोरा सिनी आखिर की चाहै छौ, जेना रजनी के जान गेलै होनै के फेनू .. । बच्ची जोन स्थिति से गुजरी रहलौ छै, हेना में अबकी हम्मै यहाँ कोय हालतों में नै रहें देभौं समधी साहब, है जानी लें ।' जानकी बाबू में नाराज होतै कहलकै ।

सम्पत बाबू तें बातों पर थोड़ों नरमे दिखाय पड़ै छेलै मतरकि हुनकों पत्निये नै जावें दै वास्ते अड़लौ होलौ छेलै । हेकरा पर जानकी प्रसाद आरो नाराज स्वर में कहलकै,

—तें तोरासिनी के यही मॉन छौं कि बच्चा साथें बच्चियो के जान चल्लौ जाय तें अच्छा । है नै समझौं कि हमरा कुछुवे बात मालूम नै छै; हमरा सभ्भे कुछ मालूम छै । टोला-पड़ोस के लोग बोलै छौं कि तोरासिनी रजनीगंधा के एक्को पैसा इलाज नै करलौ आरो बेचारी एक बूंद दवा के अभावों में तड़पी के मरी गेलै । आबें आपनों गलती छिपाय लें तोरासिनी जत्तें गाल फुलाय फुलाय बोलौं ।वहू की हम्मै बेटी के उमिर भरी वास्ते लै जाय रहलौ छियै । छुट्टी उट्टी होय जैतै तें लै आनियो । बच्ची के ई घोर छेकै तें वहू घरे छेकै । वनवास थोड़े जाय रहलौ छै ।

जानकी बाबू आरो कुछ कहतियै कि बीचे में रोकतें हुवें सम्पत बाबू कहलकै,

—ठिकके छै समधी जी, ई संबंध में बहूओ के राय जानी लेलौ जाय । जो हुनी जाय लें चाहै तें हमरा कोय आपत्ति नै ।

—है एकदम ठीक ।

बच्ची से पूछलौ गेलै तें मोरवा लुग खाड़ी किबाड़ के पीछू से वें 'हौं कहलकै ।

बच्ची के सब सामान बंधना शुरू होय गेलै । सामान की ? बस एक बड़ों रं बक्सा आरो सामान के नाम पर दू-चार गुदड़ी बनलौं साड़ी । एकबार तें मन होलै, ई सब साड़ी जे ओकरो दुर्भाग्य रं छेलै, ससुराले में छोड़ी दै । की कहतै भला ओकरो नैहरवाला ई साड़ी देखी कें । मतरकि कुछ सोचतें हुवें वैं साड़ी बक्सा में सड़ियाय लेलकै । शायद यही लें कि साड़ी छोड़ी देला सें यहाँ केकरो मनो में तकलीफो हुवें पारें ।

जखनी बैलगाड़ी पर बैठी बच्ची ससुराल सें जाबें लागलौं छेलै तें पीछू पीछू सेमलौं ऐलौं छेलै । मतरकि नैं तें चेहरा पर कोय दुख, नै तें कोय खुशी । बच्ची सोचलें छेलै, घर सें हमरों निकलथैं सेमल उदास दिखतै मतरकि हेनो नै होलौं छेलै । बच्ची टप्पर सें बाहर मूँ करी कें देखलकै । सेमल एकदम्मे बीतराग बनलौं गाड़ी के पीछू-पीछू चल्लौं आबी रैल्हो छेलै । बाहर झाँके के क्रम में ओकरो नजर बच्ची पर पड़लौं छेलै पर होनै कें जेना मेला में कोय बड़का के नजर बेलुन पर पड़लौं रहें । ‘तोहें कहिया आबी रहलौं छो ?’ बच्ची सेमल सें पूछलें छेलै मतरकि ओकरा हुन्नें सें कोय उत्तर नै मिललौं छेलै । सेमल के ई चुप्पी सें बच्चीं एतनै जानलकै, या तें हुनी हमरों नैहर जैबो अच्छा नै समझी रहलौं छै या फेनू हुनी खुद ससुराल जैबो । बच्ची चुप भै गेलै कैन्हें कि ओकरा मालूम छै, दोबारा टोकला पर सेमल समय-कुसमय जानलें-बुझलें बिनै गरमाय उठतै । से ऊ आपनो माथो टप्पर सें टिकाय भीतर बैठलें रहलै, आकाश दिश मूड़ीं उठैलें ।

बैलगाड़ी आपनो रास्ता पर रसें-रसें चलते रहलै । मतरकि बच्ची के दिमाग ओकरा सें हजार गुणा तेज विन्डोबें नाँखी ।

के नै पहुँचलौं छेलै बच्ची केँ दिखैलें, नैहर पर बच्ची के पाँव रखथैं । आरो केकरोँ-केकरोँ धौनों पर माथें रखी ऊ नै कानलौं छेलै ।

बच्ची माय के तें जेना लागै कि कानतें-कानतें प्राणे छुटी जैतै । ई स्थिति देखी जानकी प्रसादें भरैलौं कंठों सेँ कहलकै । कानै-धानै के कोय बात नै छै, आबें हम्में समझी लेबै कि हमरोँ बेटी कुमारिय छै । जे समझी केँ हम्में बच्ची केँ ऊ घरों में बिहैलें छेलै, सब बेरथ समझै छियै । आरो ई कहा हुनी बच्ची केँ साथ लेनें ऊपर दलानों पर चढ़ी ऐलौं छेलै । पीठ-माथों सहलाय-सहलाय के ढेर-ढेर समझैतें रहलें छेलै ।

मतरकि तेसरे दिन माय सेँ ई सुनी ऊ एकदम चुप होय गेलै कि जोन दिन रजनीगंधा मरलौं छेलै, ओकरोँ दोसरे रात वैँ हमरा सपना में कहलकै 'नानी तोहें हमरा कतें मानै छेलै आरो तोरा वास्ते कतें छटपटैतें रहलियै । मतरकि कोय बात नै, हम्में आइये राती लेरुआ बनी केँ जनमवौ तोरा देखैलें । आरो वही राति एक लेरुआ होलौं छेलै, माथा पर त्रिशुल के चिन्ह । हेनों लेरु कोय नै देखलें छेलै । जनमथैं लार-पुआर होय उठलौं छेलै । बच्ची माय आपने सेँ ओकरा दूध पिलावै कि केन्हों केँ ऊ बची जाय पर तीसरे रोज बच्ची माय केँ देखतें-देखतें दम तोड़ी देलें छेलै ।

खाली बच्ची के नैहरे में नै सौंसे लौर-जौर में ई विश्वास फैली गेलौं छेलै कि जनमलौं लेरु रजनीगंधे छेलै जे नानी-गोदी में खेली-कूदी खाय-पीवी स्वर्ग सिधारी गेलै । नैहरा भरी में सबके बस एक्के विश्वास छै कि रजनी पार्वती के रूप छेलै जे शिव के रूप धरी नानी केँ देखै लें ऐलौं छेलै ।

बच्चियो मानी लेलें छेलै कि रजनी तें पार्वती छेलै जे कुछ वर्ष ओकरोँ उदासी दूर करै लें ओकरोँ साथ होय गेलौं छेलै; भला देवी मनुष्यों के साथ केना रहें पारें ? आखिर केन्हें, जबें हम्में ओकरा कुछ पढ़ै-लिखै लें बतैइयै तें ऊ यही बोलै,

भजन करो भगवान का
देहिया है बिल्कुल मट्टी की ।

ऊ रजनीगंधा नै छेलै, एकदम कोय देवी-देवता के अवतार,
तभिये तें होनों बात कहतें रहै । बच्चियो मांय बच्ची के समझेले छेलै,
—बेटी, हेना के चिन्ता करला आरो उदास रैल्हा से कोखी-बच्चा
पर असर पड़े छै । हमेशा हँसलें-बोललें करों । विधि के जे विधान
होय छै ओकरा से बाहर एक पत्तो नै हिलें पारें ।

आरो माय के बात बच्ची मनो से मानी लेले छेलै—विधि के जे
विधान होय छै ओकरा से बाहर एक पत्तो नै हिलें पारें ।

:: २१ ::

—कै महिना बीती गेलै । जानकी बाबू कोय खबर नै भेजलकै ।
की बात छै ?” सुभाष बाबू आपनों पत्नी से हुक्का गुड़गुड़ैतें कहलक ।
—हम्में की बतैइयौं कैन्हें नी भेजलकौं । पतोहू तोरो, समधियो
तोरो । तोंही जानो सीता जनक के कथा ।

पत्नी के स्वर में झुंझलाहट छेलै ।

—तैहियो कुछ तें खबर हुनका भेजने चाहियो कि नै ?

—खबर तें ऐलौ छेलौं । फेनू घरों में देवी अवतार लेले छौं ।
घरों के वंश आबें रुकलें समझों ।

की सोचतै । हम्में तें ओकरा कहि चुकलें छियै कि वंश चलाय
वास्ते दूसरो बीहा करी लें । मरद के तीनो चार कनियांय रहे तें कोय
बात नै हों जनानी के ई शोभा नै दै छै ।”

—हेनों नै बोलों ।

कैन्हें नी बोलबै । की हम्में तोरो दोभियो नै छेकियो । तोहें

हमरा पकड़ी के लानला की नैं ?

—सुनों, ई सब एकदम नै बोलों । हम्मैं आबें सेमल लें कुछुवौ की करें पारों ? ससुराले के भरोसों समझों । हम्मैं तें सेमल सें यही कहै वाला छियै कि कैन्हें के ससुर के मनाय-जुनाय भागलपुरे में बसी जाव । हम्मैं जानै छियै हुनकों वास्तें जमीन-मकान बनवाय देना बांया हाथों के खेल छेकै ।

ई कही सम्पत बाबू थोड़ों देर लेली चुप्पे रहलै । फेनू बात के आगू बढ़ैतें हुवें कहलकै 'तोहें उठी के जा आरो सेमल के भेजी दौ । हम्मैं जे सोची रहलें छियै, काम वहें हुवें लें दौ । नै तें तहूँ दुख उठैवा । अभी तें तोरों देर जिनगी बाकी छै आरो हमरों की, पकलों आम । कखनी टपकी पड़ें । कल बेटा के जिनगी बनी जैतों तें समधियारौ में गोड़ राखै लायक ठांव बनी जैतों । जा सेमल के भेजी दौ ।'

सम्पत बाबू के बात सुनी हुनकों पत्नी वहाँ से बिना कुछ कहले चली देलकै, ई सोची के कि सम्पत बाबू ठिक्के कही रहलें छेलै ।

पाँचो मिनट नै बितलै कि सेमल आबी के बाबू के नगीच बैठी गेलै । तबें सम्पत बाबू आपनों दोनो हाथ रगड़तें हुवें कहना शुरु करलकै,

—देखों बेटा, आबें हमरों कोय भरोसों नै, कखनी टपकी पड़ें । आपनों दोनों भाय के तमाशा देखिये रहलें छै । घर-द्वार छोड़ी-छाड़ी ससुराले बसी गेलों । आबें माय के भार-तौरै पर, आरो केकरा ऊपर भार छोड़े पारों ।

....हम्मैं चाहै छियों, तोहें आपनों सास-ससुर से मिली जा । आपनों पत्नियो सें मिलिये-जुली के रहों । हेकरे में भलाय दिखै छें ।

आपनों सोभावों में परिवर्तन लानों बेटा । है रात-बेरात घरों सें बाहर दूसरै कन पड़लें रैहवों केकरौ अच्छा नै लागें पारें । तोरों कनियैनों यही लें दुखित छेलें । आखिर के कनियैनें नै चाहै छै कि ओकरों पति ओकरै लुग रहें ।...हमरा ई कहतें कतें दुख लागै छै कि आय तक तोहें बहू के पास रैहवों तें की एक्को मिट्ठो बोल नै बोल्लों

होवें ।....ऊ तें पत्नी रूपों में देवी ई घरों में ऐलों छों बेटा । आय तक एक्को पैसा नुकाय कें नै राखलकी । बाँही, नाकी, गल्ला के एकेक आभूषण उतारी-उतारी दै देलकी, जरियो टा ना-नुकुर करलें रहें तबें । हम्मू ओकरों ई त्याग कें नै समझें पारलियै । सुख तें की, सम्मानों दियें पारतियै तें हमरा आय एतना दुख नै होतियै । आखिर-आखिर में घरों पर छप्पर चढ़ाय लें वैं नाड़ी के चूड़ियो निकाली कें दै देलकी । धन्य छै ऊ बेटा ।....हम्में तें कहै छियौं बेटा कि तोहें ऊ देवी कें समझै के कोशिश करों ।....घरों के आर्थिक स्थिति तोहें जानिये रहलौं छों ।... आभी कुछुवो नै बिगड़लौं छों । भोरकों भुललौं सांझे घोर आवी जाय तें भुलैलौं नै कहाय छै । हम्में आय जानकी बाबू कें एक चिट्ठी लिखी दै छियै । तोरों लुग चिट्ठी लगाय दै छियौं । कल परसू तांय निकली जा । पता नै आयकाल हमरों मॉन कैन्हें बहुत घबड़ैलौं लागै छै ।

सेमलें बाबू के सब्भे टा बात सुनलकै मतरकि कुछ बोललै नै आरो चुपचाप उठी कें आपनों कोठरी में चल्लौं ऐलै । रात भरी ओकरों आंखी में बच्ची के फोटो घुरतें रहलै । बस यहें लागतें रहलै, जेना बच्ची आपनों गोदी में बुतरु लेलें ओकरा हंकैतें रहें । ओकरे इन्तजारों में महिनौ सें भुखलौ-प्यासलौं मकान के बाहरी द्वार पर खाड़ी रहें, एकदम राह निहारतें । सेमल के मॉन बच्ची लें एकदम व्याकुल भै उठलै । ओकरा सें मिलै लें । पर सेमल दूसरों दिन की, दुओ साल बाद ससुराल नै गेलै । दू महिना नै । सेमल के बाबू समझैतें-समझैतें स्वर्ग सिधारी गेलै पर सेमल पर कोय असर पड़लौं रहें हेनों बात नै छेलै । हों दू-एक चिट्ठी ई बीचों में जरूरे सेमलें बच्ची के नाम लिखलें छेलै । बहू हेने जेन्हों गुरु जी कोय चटिया कें लिखें । कै बार बीचों में सेमलं ससुराल जाय के मनो बनैलें छेलै मतरकि घंटे भर बाद मॉन ढीला पड़ी जाय ।

बच्ची बीहा के दस वर्षों के बाद आय फेनू जानकी बाबू के घोर में एत्ते खुशी देखलें जाय रहलें छेलै । दू-दू खुशी एक्के साथ मिललें छै । बच्चिये के नौकरी के खबर नै ऐलें छै, बच्ची के पतियो के । वन विभाग में फॉरेस्टर के पद पर सेमल के बहाली होय गेलें छै आरो सेरिकल्चर विभाग में रौलर पदों पर बच्ची के ज्वाइन करै वास्ते कागज ऐलें छेलै । दोनों कागज एक्के दिन, एक्के डाकिया देलें छेलै ।

हेकरो पहलें कि डाक बाबू कुछ मांगतियै, जानकी बाबू जेबों से निकाली सौ रूपया के टाका डाकबाबू के हाथों में दै देलें छेलै ।

घरों में सब्भे बस एक्के बात कही रहलें छेलै, बच्ची एकदम भागवन्ती छै । लक्ष्मी के जन्म देलें छै । दू-दू नौकरी एक्के साथ । घोर तें धनों से भरी जैतै । बच्ची के माय-बाबू ई सोचथैं निहाल होय उठै मतरकि बच्ची असकल्लों धनबादों में रहती केना ? कोय तें साथों में रहना जरूरी छै । मेहमान के नौकरी वास्ते पटना जाय लें लागलै । एक्के जग्घों में केन्हौ के नौकरी भै जैतिये तें अच्छा ।

तें बच्ची माय के चिन्ता के देखी जानकी बाबू ढाढस बंधैतें हुवें कहलकै,

—ई वास्ते चिन्ता करै के कोय कारण नै छै । एक आवेदन देला पर ई सब काम देखथैं-देखथैं होय जैतै । एत्ते दिन राजनीति में रहलिये तें कि एतनौ टौ लाभ हमरा नै मिलतै ।

मतरकि खबर करी के जबे सेमल के बुलैलें गेले आरो वैं साफ-साफ इनकार करी देलकै, एक्के जग्घों में नौकरी करै से, तें बच्ची के माय बाबू पर जेना पहाड़ टूटी पड़लै । पैहलें बार दोनों के लागलै कि पहुना के दिल बच्ची से बंधलें नै छै ।

—तें की करलें जाय ?”

—करलें की जाय बच्ची माय । हममें सोचै छिये पहुना के बच्ची साथे धनबाद भेजी दियै, जग्घों पर पहुंचैइयो ऐतै आरो रास्ता में

बात होतै तें हुवें सकें कि पहुना के दिमाग बदली जाय । अरे कोय भी आदमी आपनों पत्नी आपनों बच्चा सें अलग रहें पारें ? रहवो करतै तें कतें दिन । नौकरी एक-दू दिनों वास्तें तें नै होय छै ।

—तोहें एकदम ठीक सोचलें छों ।”

कहतें-कहतें बच्ची माय के मुंहों पर खुशी दौड़ी ऐलें छेलै ।

—एक बात आरो बच्ची माय, हममें सोचलें छियै कि ऊ बंगाली के भीखनुपर वाला मकान बच्ची नामों सें खरीदिये दियै । हमरा पहुना के रंग-ढंग देखी थोड़ों घबराहट हुवें लागलें छों । आबें हमरों जिनगी कतें दिन । अस्सी पचासी के हुवें लागलियै । आबें सोचलें-बेड़लें सबटा जल्दी-जल्दी निपटैये लेना ठीक ।

—हममें तें कहभौं कि सबौरवाला दस बिधिया जमीनो बच्ची के नामें लिखी दौं । माय-बाबू के अभाव बच्ची कें कभियो नै बुझावों । जमीनों के की कमी छै । कत्तो बेटी के नामो लिखी दै छौ, तभियो तोरों दोनों बेटा जमींदारे बनलें रहतौं ।

बच्ची माय के बात सुनी जानकी बाबू के ठोरो पर मुस्कान आबी गेलै,

—तें ठीक छै, बच्ची के सामन तैयार करवाय दौ आरो तौंही पहुना कें जाय वास्तें कहियौ । की ? जरा मरदाना समझावें-बुझावें कम पारै छै, यही लें ।

जखनी रेलगाड़ी पर बच्ची सेमल के साथ चढ़लें छेलै, बड़ी खुश छेलै । ओकरा विश्वास छेलै कि सेमल आबें ओकरा छोड़ें नै पारें । असकल्ली ऊ वहाँ वियावानों, पहाड़ी जग्घों में केना रहतै । सेमल की है बातों कें नै समझी रहलें छै ।

छुक, छुक, छुक, छुक, छुक, छुक.....

रेलगाड़ी धुँड़ियाँ उड़ैलें-उड़ैलें आपनों दिशा में भागलें जाय रहलें छेलै । बच्ची बिजली कें बड़ी ममता भरलें हाथों सें सेमल के गोदी ओर बढैलकै । बिजली सचमुचे में बिजलिये छेलै, जेना बिजली के बेलीफूल । आँख, मूँ, नाक के की गठन ! आय तक हेनों बच्चा कोय

नै देखलें होतै । ओकरा पर घुंघरैलों कारों चूल जेना चाँद के ऊपर उड़तें-उड़तें करिया बादल के एक टुकड़ा जमी गेलों रहें ।

सेमल पहलों बार आपनों बच्ची कें देखलें छेलै । सचमुचे अद्भुत रंग-रूप छेलै ।

—पकड़ों नी । जरा आपनों गोदी में लै कें देखों केन्हों शोभै छों ।

बच्ची थोड़ों मुस्कैतें हुवें कहलें छेलै ।

—छोड़ों-छोड़ों तोंही शोभों । हमरा बच्चा-बुतरु गोदी में नै लेना छै । हागी-मूती देतै तें बस.... ।

आरो सेमल बिजली कें आहिस्ता सें बच्चिये दिस हटाय देलें छेलै ।

बच्ची कें ई बातों सें तकलीफ तें होलों छेलै पर हेकरा ऊ एकदम पचाय गेलों छेलै, ई सोची कें कि ठिक्के तें हुनी कही रहलों छै ।

अढ़ाय-तीन साल के बच्चे होला सें की होय छै । बच्ची कुछ देर चुप्पे रहला के बाद फेनू आहिस्ता सें बोललै,

—तें हमरों वहाँ रहै के बारे में की सोचलें छौ ?”

—सोचना की छै । हमरा खबर मिलथें तोरों लें हम्में वहाँ एगो डेग ठीक करी देलें छियों । हमरौ तें नौकरी करनै छै । हम्में तें वहाँ तोरा राखबौं आरो तुरत्ते लौटी ऐवौं । रातो भर ठहरै के कोय सवाल नै उठै छै ।

—है केना होतै । तोहें कुछुवे दिन तें वहाँ रहि कें हमरों सब व्यवस्था देखी-सुनी ला, ओकरे बादे निकलयों, जों जल्दिये निकलना छों । नौकरी पर तें तोहें ई महिना के बादे नी जैवा ?”

—हेकरा सें की होय छै । तैयारी तें हमरा पहले सें करै लें लागें । हम्में पूछै छियों, जो हम्में तोरों साथ चार रोज ठहरिये जाय छी तें कोन मारे तोरा लें स्वर्ग उत्तरी ऐतौं आरो नहिये ठहरै छियें तें कोन तोरा पर पहाड़ गिरी पड़तौं । कान खोली कें सुनी लें, हम्में घंटों भर वहाँ ठहरै वाला नै छियों कत्तो नाक-मूँ तोहें रगड़ों । हम्में एक बार जे सोचै

छियै, वही करै छियै ।

बच्ची ई सब बात सुनि संगमरमर के मूरते रं चुप भै गेलै । चुपचाप आपनों बच्ची पर नजर गड़ैली होली शांत । ओकरा समझै में नै आवी रहलौ छेलै, आखिर आबें वैं की रं सेमल कें समझैतै । सेमल कें एतना तें समझनै चाहियौ कि एक असकल्ली पत्नी पति के बिना अनजानों जग्घों में भला केना रहतै । ऊ भी बच्ची बूढ़ी रहतियै तें कोय डोर भै नै छेलै । वैं मनेमन ढेर सिनी बात सोची गेलै ।

आरो ठिक्के में धनबाद पहुँचला के बाद सेमल बच्ची कें ओकरो लें ठीक करलौ गेलौ डेरा में उतारी वही टमटम सें घुरियो ऐलै जे टमटम सें ऊ वहाँ पहुँचलौ छेलै । अपनत्व दिखाय कें नामों पर सेमले कुछ करलें छेलै तें बस एतनै कि सबटा सामान डेरा में सजाय-धजाय कें राखी देलें छेलै आरो डेरा सें निकलै वक्ती डेरै सटलौ दूसरौ डेरा में रहि रहलौ मिसिर जी कें बुलाय कही देलें छेलै,

—जरा हमरौ पत्नी कें देखतें रहियौ । रात-बेरात कुछ्छु जरूरत पड़ी जाय तें संभाली दियौ ।

जाय वक्ती सेमल घुरियो कें नै देखलें छेलै आरो जिनगी में पहलौ बार बच्चियो आपना सें अलग होतें सेमल कें देखें वास्तें दरवाजा पर बाहर नै ऐलौ छेलै । मतरकि ओकरो लें ठीक करलौ गेलौ एक कोठरी वाला डेरा में बैठी कें ऊ घंटों कानतें रहलै । पहलौ बार ओकरो मनौ में ऐलौ छेलै कि पति के रहथैं चूड़ी फोड़ी लै आरो सिंदूर पोंछी लौ । ओकरो गोदी में ओकरो बच्चा कानतें बच्ची कें देखी-देखी कानतें-बिलखतें रहलै, मतरकि ओकरो ध्यान नै टुटलै । घंटो, कोठरी के मोखा लगी-लगी बच्ची कानतै रहलै, कानतें बेटी कें नीचें बिठाय । दोनों के कानवों-कपसवों बड़ा कारुणिक वातावरण बनाय रहलौ छेलै ।

बच्ची के डेरा हेने सुनाफड़ जग्घों में छेलै कि असकल्लों मरदानौ कें डोर लागें रात होथें एकदम सन्नाटा चारो तरफ फैली जाय । आस-पास आरो कोय मकान, आदमी नै छेलै बस ओकरोँ ऑफिस आरो ऑफिस में रहि रहलौ बी. डी. ओ. श्रीवास्व के परिवार के सिवा । सांझ होतै जखनी जंगली पशु-पक्षी के आवाज हुवें लागै तें बच्ची के प्राण निकलें लागें । आपनों बेटी बिजली कें छाती सें सटाय ऊ बिछौना के नीचू दुबकी जाय ।

पड़ोसी मिसिर सें कुछ कहै-सुनै के सवाले नै छेलै । ई तें बच्ची कें दसे रोज बाद ऑफिस के चपरासी बखरी मंडल सें पता लागी गेलों छेलै कि एक नम्बर के पियांक छै मिसिर जी । आपनों पत्नी के साथें पहलें रहै छेलै । मतरकि छवो महिना नै होलै, हिनकों पत्नी तंग आवी कें नैहर भागी गेलै । पीवी-पावी कें मिसिर जी आपनों जनानी कें कत्तें बर्दास्त करतियै । 'बखरी मरड़ सें बात सुनी बच्ची मिसिर जी सें दस हाथ दूरै रहै । कत्तें जरूरत पड़ै, बच्ची मन मसोसी कें रहि जाय पर ओकरा सें कुछ नै कहै ।

दिनौ में बच्ची कम डरलौ नै रहै । ओकरा आपनों डेरा सें एक कोस दूर सेंटर पर जाय लें लागै छेलै । रस्तो एकदम सुन्नौ । दोनों तरफ जंगले-जंगल आरो ओकरोँ बीचों सें रास्ता गुजरै छेलै बच्ची के, सेंटर पहुँचै वास्तें । बीचों-बीचों में बांस आरो पत्ता सें बनैलौ झोपड़ी मिलै । बच्ची कें मालूम छेलै, ई झोपड़ी जंगल-रखवाला के छेकै, बंदूक लै कें चौबीसो घड़ी तैनात । यही लें ऊ सुनसान रास्ता सें गुजरै में बच्ची कें ओत्तें डोर नै लागै जत्तें कि अन्हार होथें बच्ची कें डेरा में रहें लागै ।

बच्ची के जिनगी में आबें जेना कोय नै रहि गेलों छेलै, एक ओकरोँ बेटी बिजली या कभी काल हाल पूछतें रहै वाला आफिसर श्रीवास्तव बाबू के सिवा । श्रीवास्तव बाबू छेवो करलै बड़ा उदार, बड़ा

भला, शील-स्वभाव दोनों से । एकदम आपने बहिन रं मानना शुरू करी देलें छेलै बच्ची केँ । बच्चियो जिनगी के एकेक दुख कही देलें छेलै । छुपावें नै पारलें छेलै वै । आरो हेनों करि केँ ऊ सच्चे में बड़ी होलकों होय उठलें छेलै ।

—कोय बात नै छै बहिन, जौन जनानी मरदाना के साथ पावी ऊँचाई पर चढ़लें ओकरो खूबिये की ? जनानी आपनों इतिहास आपन्है गढ़ै, तभें ऊ समाजों लें इतिहास गढ़ै छै ।...जरियो टा दुख हुवें बहिन, तखनिये पुकारयो, हम्मों ऐवों । होना केँ हमरों नौकर-चपरासी सब आपने लें समझियो ।

श्रीवास्तव बाबू जबें मिलें तें घुमाय-फिराय केँ यही बोलै आरो ई बातों सेँ बच्ची केँ बड़ी बोल मिलै ।

रात केँ सुतै वक्ती जबें ऊ बी. डी. ओ. श्रीवास्तव बाबू आरो आपनों पति सेमल के चेहरा आपनों आँखी के सामना लाने तें ओकरो मोंन केना-केना करेँ लागै । बस रहि-रहि केँ ओकरो आँखी में सेमल के एक्के चित्र घुमी-घुमी जाय कि घरों में घुसी ऐलों कुत्ता या बिलाय केँ घेरी-घेरी मारी रहलें छै । अंगना के डेड़िया भिड़काय केँ । बच्ची आपनों मनो केँ जबर्दस्ती दूसरो दिस खींची केँ लै जाय मतरकि ओकरो आँखी के सामना फेनू होने रं के दृश्य आबी केँ खाड़ों होय जाय; सेमल टीनों के पीछू छुपलें भोकसों रं के मुसों लै आनलें छै । आरो ई सब दृश्य केँ सोचथें बच्ची के रोआं-रोआं भय-घृणा सेँ सिहरी उठै । आरो ऊ उठी केँ खाड़ी भै जाय, श्रीवास्तव के क्वार्टर दिस मुँ करी केँ । ओकरो सब घृणा, सब भय दूर होय जाय । तबें बच्ची बस एक्के बात सोचै बी. डी. ओ. बाबू जरूरे ऊ जन्मों में हमरों भाय रहलें होतै । भाइयो आय तक हमरा हेनों प्यार नै देलें होतै ।

पाँच साल बाद ।

—देखों भाभी जी, चाहे तोहें हमरा कत्तो बाहर निकालै लें चाहों मतरकि यहाँ से टसके वाला नै छियो ।” मिसिर जी केँ मुँहों सेँ दुर्गन्ध निकली रहलें छेलै “देखों भाभी तोरों देख-रेख केँ भार भायजी

हमरा पर छोड़ी गेलों छौं आरो आय तक तोहें हमरा सें सहयोग की, पूछ-पाछ भी नै करलौ । आय तें हम्में तोरों हाथों के खाना खाय कें जैभौं । हमरों घोर भागलपुरे छेकै ।

—हम्में कहै छियौ, तोहें बाहर निकली जा । तोहें केकरा कहला पर हमरों भंसा में घुसलौ ! तोरों हिम्मत केना कें पड़लौ ।”

—हेकरा में हिम्मत के की बात छै । जहाँ भाभी वहाँ दियोर । आरो ई कही मिसिर जी धीरें-धीरें बच्ची लुग आवै के कोशिश करें लागलै । बच्ची कें कुछ समझै में नै आवी रहलौ छेलै कि वें की करें । कुछ रास्ता बचै के नै देखी कें ऊ भंसा से मिसिर जी कें धकियैतें होलें बाहर निकली ऐलै आरो ‘भाय जी’ बोली कें जोर सें हाँक लगैलकै ।

हिन्नें बच्ची के हाँक लगाना छेलै कि हुन्नें से बी. डी. ओ. श्रीवास्तव हाथों में बंदूक लेलें चपरासी बखरी मण्डल के साथें आवियें तें गेलै । आखिर संकट के पुकार छेलै से श्रीवास्तव बाबू बिना कुछ आवाज लगैले दनदनैले बच्ची के डेरा घुसी ऐलै । तब तक मिसिर जी भंसा सें बाहर होय डेरा सें निकली जाय के कोशिशो में छेलै ।

—मिसिर तुम ? यहाँ क्या कर रहे थे ?”

—ऐसा है साहब कि घर में कुछ खाने को नहीं था, सोचा भाभी से ही कुछ लेकर खा लूँ । बस इसी से दो रोटी मांगने चला आया था । बगल में दुकान भी तो नहीं है कि कुछ ले आता ।

—मिसिर, मुझे तुम्हारी हरकतें मालूम हैं । बदतमीज, एक भली औरत के घर में घुस आने की सजा तुम्हें मालूम है । आज तुम्हें दुकान में कुछ नहीं मिला, कल से तुम्हें कभी सरकारी नौकरी नहीं मिलेगी । में तुम्हारे लिए वह व्यवस्था कर दूंगा ।

—ऐसा न कहिये साहिब, मेरे बीबी-बच्चे मर जाएंगे ।

मिसिर जी स्वर में एकबैगे गिड़गिड़ावें लागलौ छेलै ।

—बीबी-बच्चे, हुँह । उन सबों को तो तुमने अपने व्यवहारों से कब का मार दिया है । मुझे सब पता है । अब उसी कर्म का फल भुगतोगे ।

—साहब...”

—तुरंत बाहर निकल जाओ, वरना मुझे पुलिस को बुलाना होगा।

मिसिर जी के बाहर होथें श्रीवास्तव बाबू बच्ची के मजबूत स्वर में कहलकै,

—घबराने की कोई बात नहीं बहन। घर घुसा, तो इसकी सजा इसे कल ही मिलेगी जाओ, खाओ-पीओ आराम करो। मैं कल से एक चपरासी तुम्हारे दरवाजे पर लगवा दूंगा। डर-भय की कोई बात न सोचो।

....बखरी, आज की रात इनके दरवाजे पर अपना बिछावन लगा लो। कल से सुक़्खी की ही रात में यहाँ सोने की ड्यूटी रहेगी। अच्छा तो मैं चलता हूँ बहन।

ऊ रात बिछावन पर पड़लों-पड़लों बच्ची सोचतै रहलै कि आखिर वैं की करें ? कभी मनोँ में सोचै, आबें ई जग्घों में रहना बेकार। कभियो कुछु खतरा हुवें पारें। फेनू श्रीवास्तव बाबू के खयाल आवै, कि हुनकोँ रहतें के की बिगाड़ें पारें। मतरकि हुनिये यहाँ कब तक रहतै। बदली तें एक न एक दिन होनै छै। हमरा जोगै लें थोड़े बैठलों रहतै ? तबें फेनू ?

....तें की ओकरा नौकरिये छोड़ै लें लागें। ई विभाग बिहार में आरो काहीं छै की नै छै बदली कराय लों।...जों नौकरी केँ छोड़ी दै छियै तें देखें वाला ही के छै। एक बाबू-माय के आसरा छेलै, हुनियो दू साल पहलें महिना भरी के अन्तर सेँ स्वर्ग सिधारी गेलै। भाय भौजाय के आसरे की। बाबुवे रहतें जबें नै पूछै छेलै, तें आबें की आसरा !

बाबू के याद ऐथें जानकी बाबू के लिखलों आखरी चिट्ठी के एकेक शब्द बच्ची के दिमागों में घुमें लागलै,

हमरोँ बेटी,

खूब फलों-फूलों। हममें जिनगी में कभियो ई नै मानलियै कि हमरा कोय बेटी छै। तोहरे बेटा मानतें ऐलें छियौं। आरो कुछुवो नै

५८ □ अंतहीन वैतरणी

लिखी कें बस एतनै लिखै छियौं कि सबौर वाला धनखेत तोरों नामें रजिस्ट्री करी देलें छियौं आरो भीखनपुर में एक कोठियो तोरों लें खरीदी देलें छियौ, तोरे नामें । आबें हमरों जिनगी के कुछवे भरोसों नै । हिम्मत नै हारियों बेटी ।

तोरों बाबू
जानकी प्रसाद

ठीक जानकी बाबू के चिट्ठी मिलला के एक्के रोज बाद बच्ची कें तार मिललौं छेलै कि जानकी बाबू इन्तकाल करी गेलात । बच्ची के छाती फाटी कें रहि गेलौं छेलै । सोमवार कें तार मिललौं छेलै आरो बुध कें भागलपुर आवै के वैं मॉन बनाय लेलें छेलै कि मंगले के फेनू तार डाकिया पहुँचैलें छेलै—माय के स्वर्गवास के तार । बच्ची पर तें जेना पहाड़-पर्वत गिरी गेलौं रहें । ऊ भीतरे भीतर छटपटाय के रहि गेलौं छेलै । आरो हठाते वैं आपनों भागलपुर जाय कें निर्णय बदली लेलें छेलै । तहियों सें बच्ची भागलपुर में गोड़ नै राखलें छेलै ।

आय जबें भागलपुर जाय के बात वैं सोचलकै तें एक्के करी कें सब बितलौं बात ओकरो दिमागों में घूमी गेलै । ‘मतरकि यहाँ रहनौ तें मुश्किल वैं मनौं में सोचलकै जे भी हुवें ऊ यहाँ सें कल्हे चल्लौं जैतै । बस श्रीवास्तव बाबू कें खाली भोरे खबर करी देना छै ।

दूसरे दिन सुबह ।

—कि बात छेकै बहिन ? है अटैची-उटैची सहित ? समझी गेलियै । कोय बात नै छै । तोरों बदली हम्में मुंगेर कराय दै छियौ । वहुँ ई विभागों के एक शाखा छै । तोहें भागलपुर पहुँचवा आरो पाँच रोज के बाद तोरों कागजों पहुँचतै । भाय कें रहतें बहिन कें चिन्तै की? हमरों ड्रायवर तोरा स्टेशन पहुँचाय आवै छौं ।

आरो जखनी बच्ची जीप पर चढ़तियै ऊ हठाते बी. डी. ओ. श्रीवास्तव बाबू के गोड़ों पर एकदम झूकी ऐलै । ओकरो लोर हुनकों गोड़ों पर झरझराय ऐलौं छेलै ।

अरे बच्ची बिटिया ! आव! कत्ते उमरदराज लागे लागला ।
भागलपुर स्टेशन से बाहर ऐथे कोय टमटम वाला पुकारले छेले ।

—के रहमान काका ? अरे तोहे टमटम हाँके लागलौ ?”

—आरो तबे की करतिये बेटी । टमटम चलैवो ते पुस्तैनी काम
ठहरले । फेनू घरों में हेनो फूट पड़ले कि हेकरो सिवा कोय रास्ता नै
बची रहलो छेले ।”

रहमान मियां बच्ची के सामान टमटम पर लादते-लादते कहलकै ।
तब तक बच्चियो टमटम के पीछू में बैठी चुकलो छेले । रहमान मियां
के घोड़ा के चारो तरफ चाबुक घुमाना छेले कि घोड़ा टप-टप करी के बढ़ी
चलले । चाबुक घुमैतै-घुमैतै रहमाने कहलकै, “बाबू ते नै रहलो बेटी
मतरकि तोरो ले जे हवेली खरीदी देले छौ ओकरो कोय जोड़ नै हुवे
पारे । पहुने वही हवेली में आबे रहे छौ । सुने छियो कि यहां कोय
ऑफिसों में बदली कराय लेले छौ । तहूं बेटी, केन्हे नी यही कोय
ऑफिसों में बदली कराय ले छौ । घर-परिवार से दूर रहला पर की शांति
मिले छौ ? सुखे नोन-रोटी मिले, पर परिवार, परिवार होय छे ।

आरो कुछ देर चुप रहला के बाद रहमान मियां पूछले छेले,

—की बेटी, तोहे इखनी आपने वाला हवेली नी जैवा ?

—हो काका । वहाँ नै जैवो ते नैहरा में आबे रहिये गेलै के ?

पर नै काका, पहले भैया-भाभी से मिलनै अच्छा होतै ।

—आबे हममें की कहियो बेटी ।

कहते-कहते बच्ची आरो रहमान मियां दोनो के कंठ भरिय ऐलो
छेले ।

बच्ची के आवै के खबर लगना छेलै, कि सेमल के सबटा खुशी जेना हेराबेँ लागलै । जोन दिनो सें भीखनपुर वाला हवेली बच्ची लेली खरीदलों गेलों छेलै ओकरों दसे रोज बाद सें सेमल यै में रहना शुरु करी देलें छलै । जानकी बाबू के राजनीतिक लाभ उठैतें आपनों बदलियो भागलपुरे कराय लेलें छेलै । आरो सास-ससुर के मरला के बाद तें आपनों मैइयो के वही हवेली में लै आनलें छेलै ।

जखनी सेमल कें खबर लागलै, तें ओकरों सुक्खों पर लागलै जेना पाला पड़ी रहलें छै ।

—सुनै छियौं बेटा, पतोहू आवी गेलों छै । भाय-भौजाय कन आवी कें राती ठहरलें छै । रहमान मियां आवी कें खबर करी गेलों छौं । यहें कहलकौं कि ‘भोरे बच्ची बिटियो ऐतौं । आबें ?’

सेमल मांय सशंकित बोली में सेमल सें पूछलकै ।

—हमरो मालूम छै । मतरकि हेकरा में घबड़ाय के की बात छै । हममें तें यहू तक पता लगाय लेलें छियै कि ऊ नौकरी छोड़ी कें नै ऐलों छै । मुंगेर में नौकरी करतै । अच्छे तें होतै कि पुस्तैनी घरों के जोगवारी होय जैतै । तहुं बीचों बीचों में वही रहियें । घरों में आरो कोय तें छै नै कि ओकरों देखभाल करतै । हेनों नै करला सें कहीं नौकरिये छोड़ी ऊ भागलपुर आवी कें बसी गेलौ तें तोहीं समझें ।

—देख बेटा, हमरा मुंगेर में रहै सें कोय आपत्ति नै । मतरकि हमरों साथ रहला सें तोरों वंश नै बढ़तौ । कुलों में बेटा नै होला सें वंश-वृद्धि के बात केना सोचलों जाबें सकें छै । हममें तें कहभौं कि तोंही कनियांय के साथ मुंगेर में रहों । हममें ई मकान के देखभाल करै छियौं । पतोहू एक बेटा के माय बनी जाय फेनू हमरा की । हमरा जहाँ राखै लें चाहों, जेना चाहों, रहै लें तैयार छी ।

ई कही माय आन कोठरी में चल्ली गेलै तें सेमलो सोचें लागलै, ठिक्के तें माय कहै छै, बेटा के बिना वंश की, परिवार की ! फेनू एत्तों

बड़ों हवेली के कोय मालिक तें होनै चाहियो । नै तें ई मकानो सरकारिये होय जैतै ।....फेनू ऊ दिन वै तांत्रिको तें यही कहलें छेलै, ले बेटा, ई ताबीज राखी ले । शुभ दिन देखी कें आपनों बहू के बाँही पर बांधी ऊ रात ओकरोँ साथ रहला पर तोरा जरूरे बेटा के परापत होतौ । तांत्रिक के वचन छेकै बेटा, खाली नै जावें पारें, भगवान के वचन खाली चल्लों जाय तें चल्लों जाय ।' साधु के वचन याद ऐथें सेमल एकबैगे गुदगुदाय उठलै । तें अबकी बच्ची के साथे रहलें जैतै ।.... महिनौ भरी...मतरकि ओकरा नौकरी पर जे आना छै । 'ओकरोँ' मनोँ में प्रश्न उठलै ।'.. जे भी हुवें, ऊ बच्ची के साथें मुंगेर चल्लों जैतै । महिनौ भरी के छुट्टी लै कें । वांही रहतै । बेटा के सुख सें बढी कें नौकरी के सुख नै हुवें सकें । फेनू है धनो केकरा लें, जबें बेटे नै रहतै ।... मतरकि बच्ची के नै जानौ केन्हों रुख होतै । नौकरी पर छोड़ी ऐला के बाद ऊ तें घुरियो कें ताकै लें नै गेलै, मरली की बचली । की जरूरी छै, आबें बच्ची वही-वही मानिये लेतै, जे-जे वै कहतै !'

सेमल के मन एक बार फेनू शंका खाड़ों करी देलकै आरो अनचोके ऊ उदास होय उठलै । चिंता में ऊ आपनों कोठरी में चमगादड़ नांखी चक्कर लगावें लागलै । कि हठाते ओकरोँ गोड़ रुकी गेलै । ओकरोँ मनें कुछ रास्ता निकाली लेलें छेलै आरो ओकरोँ चेहरा पर खुशी के भाव दिखावें लागलें छेलै ।

सेमल दूसरोँ कोठरी में पहुँचलै आरो जल्दी-जल्दी आपनों बाहर जायवाला पोशाक चढ़ाय लेलकै । भोरकोँ आठ बजी रहलें छेलै । वै आपनों बक्सा निकाली कें जमीन पर राखी देलकै आरो कुछ कपड़ा वै में, कुछ कपड़ा बाहर बिखरलें-बिखरलें राखी देलकै । आरो बाहर निकली खिड़की सें बच्ची कें आवै के इन्तजार करें लागलै । कि तखनिये बच्ची कें रहमान मियां के टमटम सें ऐतें वै देखलकै । सेमल उल्टे गोड़ लौटी झटपट आपनों बक्सा फेनू सड़ियाय में जुटी गेलै ।

रहमान मियाँ बच्ची के सामान उठैतें आरो बच्ची कें रास्ता बतैतें सीधे दलानी पर चढ़ाय देलें छेलै । सामनै में सेमल बक्सा सड़ियैतें

दिखाय पड़ी गेलै ।

—अरे तोहें ।

अनचोके सेमलें आपनों चेहरा पर ढेर-ढेर खुशी लै आनलें छेलै आरो हेनों भाव बनैलें छेलै जेना बच्ची के भागलपुर ऐवों ओकरा मालूमे नै रहें । रहमान मियां सामान रखी कें नीचें उतरी गेलों छेलै ।

—हम्में तैयारिये करी रहलें छेलियों तोरा लुग जाय के । है सोची लेलें छेलियै कि तोरों नौकरी-चाकरी सें हमरा कुछ नै लेना, आबें तोरा सें अलग रहि कें हमरा नै जीना छै । एतें बड़ों हवेली एक तोरे बिना कतें-कतें सुनें लागै छै ।....हम्में जानै छियै, माय-बाबू मरलौ पर तोहें भागलपुर कैन्हें नी ऐला । हम्मू वही सोची के तोरा लेलें नै गेलियों । ओकरों बाद यहू सोचलियै कि तोरा में गुण छों, योग्यता छों । हेकरा हेने कें बर्बाद करला सें की फायदा ! से बहुत दिनों बादो तोरा वहाँ सें नै आनलियों । बीचों में कै बार मॉन करलै कि तोरा चिट्ठिये लिखयों, जों तोरा वहाँ मॉन नै लागों तें नौकरी-चाकरी छोड़ी कें यहाँ चल्लों आवों । मतरकि सवाल नौकरी या पाँच सौ रुपया के नै छेलै, तोरों योग्यता-प्रदर्शन के छेलै । आइयो हम्में नै चाहै छियै कि तोहें नौकरी छोड़ों । पर की करों, आबें तोरों बिना जिनगी बड़ी सुन लागें लागलों छै । देखी रहलें छौ नी, है तोरै लै आनै के तैयारी छेलै । अच्छा होलै कि तोहें आबी गेला । लागै छै, हमरों मन के पुकार तोहें सुनी लेलौ या भगवाने तोरा हमरों मॉन देखी कें यहाँ लै आनलकों ।

कहतें-कहतें सेमलें बच्ची के हाथ पकड़ी लेलें छेलै आरो आपनों विश्वास के विरुद्ध सेमल के ई सब बात सुनी-देखी बच्ची एकदम गली गेलों छेलै आरो ओकरों गोड़ों पर गिरी कपसी-कपसी कें कहें लागलों छेलै,

—आबें तोहें हमरा एक्को दिनों वास्तें नै छोड़ियो, नै तें हम्में जहर खाय कें जान दै देभों । तोहें नै जानै छों कि तोरों बिना हमरों की स्थिति होय जाय छै ।”

—चुपें रहों । आबें हेनों कहियो नै होतै । हम्में हमेशा तोरे

साथ रहवों ।...चुप रहों । देखों बेटी केना घुरी-घुरी कें हमरा दोनों कें देखी रहलौं छौं ।

आरो सेमलें बच्ची कें एक ओर करि आपनों बेटी कें गोदी में उठाय लेलें छेलै, लगातार ओकरों गाल कें तीन-चार बार चूमतें हुवें । ‘अरे कत्तें बड़ी होय गेली हमरी बेटी ! माय देखें, तोरों पतोहू आवी गेलौ ।...देखें-देखें तोरों पोती कत्ती बड़ी होय गेलौं छौ । ‘आरो ई कही बेटी कें लेलें एक ओर बढ़ी गेलौं छेलै । बिजली हैरत सें ई सब देखथें रहि गेलौं छेलै । ओकरा कुछू समझै में नै आवी रहलौं छेलै, कि ओकरा चुम्मा पर चुम्मा लै वाला आदमी के छेकै । बस टुकुर-टुकुर गोद लै वाला कें देखतें चल्लौं जाय रहलौं छेलै । पता नै, हैरत सें या डरों सें ।

:: २६ ::

सेमल के व्यवहार देखी बच्ची कें यही लागलौं छेलै कि आबें सब कुछ पहलकों बदली गेलौं छै । ओकरा बितलौं बातों के कुछुवो दुख नै रहि गेलै । बस हेनों बुझावै लागलै कि भोरकों भुलैलौं सांझे लौटी ऐलौं छै । मनौं में नया सिरां सें बचलौं जिनगी कें संवारै के बात उठतें रहै । आवें भगवान के भक्तियों में बच्ची कें मौन खूब लागें लागलौं छेलै । बस ओकरों मनौं में यहें बात उठै कि सेमलें ओकरा एत्तें मानें लागलै, तें भगवाने के कृपा सें । वैं सोचै-ओकरों दुख भगवानों सें नै देखलौं गेलै, तहीं सें सेमल के सोभाव में हेनों बदलाव लानी देलें छै ।

श्रीवास्तव बाबू के कहले मुताबिक ठीक पाँचे रोज बाद एक रजिस्ट्री डाक बच्ची नामें ऐलौं छेलै । चिट्ठी साथें टाइप करलौं एगो परचो छेलै । मुंगेर जाय कें ज्वाइन करै लें । बच्ची बड़ी हुलसी कें कागज सेमल के देखैलें छेलै आरो कागज देखी बच्चियो सें जादा खुशी

६४ □ अंतहीन वैतरणी

सेमल कें होलों छेलै । ऊ दू दिन ताँय बच्ची के आगू-पीछू घुमतेँ-करतेँ रैह्लों छेलै, जेना सेमल के जिनगी में ओकरों सिवा आरो कोय्यो छेवै नै करै ।

कागज मिलला के तीन रोज बाद बच्ची मुंगेर जाय नौकरी करना शुरू करी देलें छेलै । ओकरों साथ सेमल आरो सासो गेलों छेलै । पैहलों बार सेमल बच्ची साथें महिनौ-महिनौ साथ रहलें छेलै । ऑफिस सें आवै के पहले सेमल घोर लौटी आवै । ओकरों एकेक इच्छा जरूरत के ख्याल राखै सेमलें । पता नै तांत्रिक के स्मरण करी कें या फेनु आरो कुछ सोची कें, या फेनु सब्भे बात सोची कें । जे भी हुवें सेमल के हेनों आत्मीय व्यवहार अपना प्रति देखी कें बच्ची के जिनगी में जेना सौ-सौ बसन्त एक्के साथ आवी गेलों छेलै । आरो एक शुभ दिन देखी कें सेमलें बच्ची के बाँही पर तांत्रिक के देलों ताबीजो बांधी देलें छेलै । बच्चियो के खुशी के कोय ठिकानों नै रहि गेलों छेलै ।

पर ऊ दिन तें बच्ची कें मॉन एकदम्मे बैठी गेलों छेलै जबें ट्रेनिंग लें ओकरा पटना जाय के नोटिस मिललै । सेमल सें अलग होय के बात वैं आबें सोचै नै पारै छेलै । ऊ भी पाँच-छों रोजों के ट्रेनिंग रहतियै तें एकठो बात छेलै । पाँच-पाँच महिना के ट्रेनिंग । कागज मिलथें बच्ची के दिल बैठी गेलों छेलै । ओकरों मॉन यही करलें छेलै कि नौकरिये छोड़ी देना अच्छा । मतरकि सेमलें समझैलें छेलै कि केना नौकरी-चाकरी करला सें औरत के बुद्धि-व्यक्तित्व बढ़ै छै । पाँच-छों बरस जबें ऊ दोनों अलग अलग रहि कें रहें पारै छै तें ई पाँच महिना की छेकै । दिवस जात नहीं लागहु बारा । देखथें-देखथें दिन केना पार होय जैतै, हमरा दोनों में से केकरौ पता नै चलतै । पाँचे महिना के तें बात छै, फेनु तें जिनगी भर साथें रहना छै ।

सेमल के एत्तेँ-एत्तेँ समझैला पर बच्ची ट्रेनिंग वास्तें पटना जाय लें तैयार होय गेलों छेलै, आरो सेमले के कहला पर बच्ची आपनों पेमेन्ट उठाय कें ऑथिरिटी सर्टिफिकेटो सेमल कें दै देलें छेलै । आपनों ऑफिसरों कें कही देलें छेलै कि ओकरों बदला ओकरों पतिये कें पाँच

महीना तांय रूपया उठाय के अधिकार रहतै ।

जोन दिन ऊ ट्रेनिंग लें सेमल सें अलग होय रहलौं छेलै, पाँव साथें ओकरो मनो भारी-भारी छेलै । ऊ वही भारी गोड़ आरो मनो सें सेमल सें अलग होलौं छेलै । मतरकि पटना पहुँची कें ऊ आपना कें सेमल के यादों में डुबाय बड़ी खुश रहें लागलौं छेलै ।

दिन भरी ट्रेनिंग आरो रात कें वही सेमल के याद । बीतलौं कुछ महिना के एकेक बात याद करी कें बच्ची गाछ पर फुदकतें गिलहरिये नाँखी गुदगुदैतें रहै ।

आरो देखथैं-देखथैं महिना बीती गेलै । बच्ची के बेताबी आरो बढ़ी गलै । सेमल ओकरो वेतन उठाय कें भेजतै, साथे-साथ चिट्ठी । वै चिट्ठी में कतें रं के मन हुलसावै वाला बात होतै । ई सब बात सोचथैं बच्ची के गोड़ों में जेना पंख आरो घुंघरु एक्के साथ बंधी-बंधी जाय । मतरकि वेतन नै ऐलै । सेमलें वेतन उठाय कें भागलपुर चली देलें छेलै, माय के साथें लेलें आरो बच्ची पटना में ई सोचतें रहलै, 'हुवें नै हुवें हुनको मॉन खराब होय गेलों होतै । नै तें ई हुवै नै पारें कि वेतन नै भेजै । की हुनी नै जानै छै; ई जंगल-पथार में हम्में टाका बिना केना रहवै ? के हमरा रूपया देतै ? केन्हौं-केन्हौं हम्में एक महिना काटलें होवै । जरूरे हुनको तबीयते बहुत खराब होय गेलों छै, जे हुनी हमरों वेतन नै भेजें पारी रहलौं छै ।...खैर वेतन के कोय बात नै छै, नै ई महिना में नै अगला महिना में । दोनों महिना के वेतन तें ऐवै करतै । आपनों ऑफिसरों सें कही कें रूपया लै लेबै, की होतै, आगू महिना में कर्जा चुकाय देबै । बस ईश्वर करें कि हमरों पति के तबीयत जल्दी ठीक होय जाय ।' आरो बच्ची आपनों ऑफिसर सें महिना भरी के खर्च चलाय लें रूपया कर्ज रूप में लै लेलें छेलै ।

मतरकि दूसरो महिना जबें बच्ची कें वेतन नै मिललै तें ओकरो शंका एकदम उल्टी गेलै । वैं, मुंगेर आफिसर कें चिट्ठी लिखलें छेलै कि वेतन सेमल उठाय रहलौं छै कि नै ? आरो जबें ई जानलकै कि सेमलें दोनों महिना के वेतन उठाय लेलें छै तें ओकरो मॉन आपनों पति लें

वही घृणा से भरी उठलै । ओकरो मनो में होलै वें आपनो आफिसरो कें चिट्ठी लिखी दै कि हमरो वेतन हमरो पति कें नै दै कें हमरा लुग डाक से भेजी देलो जाय । मतरकि ई बात लै कें ओकरो आफिसरो की सोचतै ।' यही सोची बच्ची एकदम शांत होय गेलै ।

तेसरो महिना । चौथो महिना । पाँचवो महिना ।

सेमल बच्ची के वेतन उठैत रहलै आरो बच्ची वहाँ केकरा-केकरा से नै कर्जा लै आपनो ट्रेनिंग पीरियड काटतै रहलै ।

हेनो आदमी के साथ जिनगी कटै के बात सोचवो एकदम फिजूल...अकेलो रहि जिनगी काटवो दुखदायी छै जरूर, मतरकि हेनो मरद के साथ रहवो तें जीते जी नरक में सड़वो होतै । जे भी हुवें, ऊ आवें नै तें मुंगेर जैतै, नै तें भागलपुरे । यही बदली कराय लेतै । बच्ची सबकुछ सोचतै मनो में यहू दृढ़ संकल्प करी लेलकै ।

आरो बच्ची करलकै भी वही ।

वें वही से श्रीवास्तव बाबू कें एगो चिट्ठी लिखलें छेलै, सब कुछ खोली कें लिखतें हुवें । ओकरा श्रीवास्तव बाबू पर अथाह विश्वास छेलै, आरो विश्वासे अनुरूप हुनको लिखा-पढ़ी, दौड़-धूप करला के बाद बच्ची कें पटनै के एक आफिस में बदली होय गेलो छेलै । ई सब में जानकी बाबू के प्रतिष्ठा हमेशे मददगार बनै छेलै ।

आरो हेकरे साथ बच्ची आपनो एक नया जिनगी शुरू करै के नींव डाललकै ।

पटना के आफिसो में काम करतै बच्ची कें पाँच वर्ष आरो बीती गेलो छेलै । सहारा के नाम पर ओकरो पास किशोर होती बिजली आरो चार वर्ष के बेटा अश्वघोष ही रहि गेलो छेलै ।

ई संयोग छेलै या भगवान के कृपा या तांत्रिक के वरदान । कोय कुछ नै कहें पारें, मतरकि अश्वघोष के जन्म कें बच्ची परमेश्वरे के असीम कृपा मानलें छेलै ।

तब्बे से नै तें बच्ची सेमल कें एक्को दिन याद करलें होतै, नै तें सेमलें बच्ची के खोज-खबर लै के सोचलकै । दू धारा में दू जिनगी

बहें लागलों छेलै, एक दूसरा सें अलग-बेखबर । पता नै सेमल की सोची रहलों छेलै, मतरकि बच्ची तें एकदम बदली गेलों छेलै, आपनों पत्नीत्व के सब जेवर-जेवरात उतारी कें । यहाँ तक कि पाँच बरस आरो बीती गेलै । बच्ची कें यहू नै खयाल होलै कि ओकरों कोय ससुराल छै, ओकरों पति ओकरों बिना केना रहतें होतै ।

चिरिंग के कौंध रं कभी-कभार सेमल के याद आवी गेलो रहें तें आरो बात छै ।

आखिर बच्ची कें दुक्खे कोन बातों के रहि गेलों छेलै । पन्द्रह सोलह बरस के बेटी बिजली होय चल्लों छेलै आरो दस-बरस के बेटा अश्वघोष । बच्ची कभी-कभी दोनों कें सामना खड़ा करी कें देखै एकदम चाँद-सुरुज के जोड़ा जेना ओकरों ऐंगना में उतरी गेलों छेलै । आरो वैं दोनों कें आपनों छाती सें सटाय लै ।

:: २७ ::

तोहों !”

कैन्हें, आबें हमरों बहिन बहुत सुक्खों में छै तें की ओकरों रिटायर्ड भाय देखौ लें नै आबें पारें !

श्रीवास्तव बाबू मुस्कैतें हुवें कहलें छेलै । रिटायर्ड होथें सचमुचे में हुनी कतें बूढ़ों हेनों लागें लागलों छेलै ।

—नै भाय साहब, तोरा देखी कें हमरों जिनगी के खुशी दसगुणा बढ़ी गेलों छै । तोहें कभियो हमरा हमरों बाबू के अभाव नै बुझावें देलों, एत्तें बड़ों उपकार हमरा पर आरो केकरो छै !

—अरे हेनों कोय बात नै छै बहिन । आदमी कुछ अच्छा काम करै छै तें आपनै कें जीवित राखै लें । फेनू आदमी होय के नातें

६८ □ अंतहीन वैतरणी

एतनाटा करवों तें हमरों धर्म छेलै । तोरों हेनों बहिन लें आपनों सोंसे जिनगियो तोरों खुशी में लगाय देवों कोय मानें नै राखे छै ।

ई कहतें-कहतें श्रीवास्तव बाबू आपनों अटैची लेलें डेरा के भीतर घुसी ऐलै, बच्ची पीछू-पीछू । आरो एक कुर्सी आपने सें खींची वै पर बैठते कहना शुरु करलकै,

—तोहें की समझै छों बहिन, तोहें कुछ नै हमरा खबर करला तें की हमरा कुछवो नै खबर होतै । आय तोरा एकटा बात बताय दै छियौं कि तोरों बाबू हमरों बाबू के पकिया मित्र छेलै । एक्के साथ पढ़लकै, एक्के साथ राजनीतियो । तोहें है सब कुछवो नै जानै छों ।

है तें हम्मू नै जानै छेलियै कि तोहीं जानकी चाचा के लड़की छेकी । जखनी तोरों कागज-पत्तर देखलें छेलियै तैहियो सें हमरों खुशी के कोय ठिकानों नै रहि गेलों छेलै आरो मने-मन सोची लेलें छेलियै कि तोरों खुशी लें हमरा ऊ सब करना छै, कि दुनियाँ देखें ।.....मतरकि बाते कुछ हेनों होय गेलै कि... । तोहें है नै समझियौं कि वहाँ सें तोरों ऐला के बाद हम्में तोरों खोज-खबर नै लेतें रहलियौं...बोलों कि तोरा ट्रेनिंग-पीरियड में वेतन नै नी मिललौं ? तोहें ऑथरिटी सर्टिफिकेट आपनों पति कें दै देलौं छेलौ ? बोलों, ट्रेनिंग-पीरियड में तोरों ऑफिसरें सहयोग करलकौ ? मुंगेर सें लै कें पटना तक तोरों एक-एक दिन के निगरानी हम्में टेलीफोन सें करी रहलौं छियौं । ओकरो सें पहलें, जबें तोहें हमरा पटना लें चिट्ठी लिखलें छेलौ ।

श्रीवास्तव बाबू के एकेक बात सुनी कें बच्ची हर्ष आरो दुक्खों के सागर में डुबतें-उतरैतें रहलै । ऊ कुछ बोलें नै पारी रहलौं छेलै ।

—तें आय हमरों आवै के एक खास मतलब छै । यानि कि हम्में तोरा सें कुछ मांगै लें ऐलौं छियौं ।’

—की ? बच्ची के सोंसे देह में एक वैगे अथाह खुशी दौड़ी ऐलै ।

—हम्में चाहै छियै कि बिजली के शादी पूर्णिया वासी रामसेवक के बेटा सहजानन्द से करी देलौं जाय । लड़का बड़ी कर्मठ छै । बोकारो के एक सरकारी आफिस में मैनेजर छै । रामसेवक बाबू खुद हमरों पास

ऐलौं छेलै । लड़की कें हुनी देखलें छै । आबें हुनकों हेने जिद छै कि हमरा यहाँ तांय आभै लें लागलौं । हम्ममें रामसेवक बाबू कें जानै छियै । एक समय में कै आदत के मालिक छेलै । आयकल खगी गेलौं छै । परिवार बड़ौं छै, ये लेली हुनी थोड़ौं तंगी में रहै छै । मतरकि दिलौं के बड़ी राजा छै । फेनु तोरा ई सबसं लेना-देना की ? तोरा तें दामाद सं मतलब होना होतौ ।...बहिन, आबें तोरौं मर्जी पर सब कुछ निर्भर करै छै ।...दहेज कौड़ी वास्तें भी तोरा नै सोचना छै । हम्ममें जानै छियै कि हुनी जतना टा मांग करतै, ऊ हम्मिं दियें पारौं ।

बच्ची के जिनगी पर सं कत्तें बड़ौं भार उतरी रहलौं छेलै । खुशी सं ओकरौं आँखी सं लोर चुहचुहाय पड़लै । कुछ नै सोचै पारलै । बस एतनै ओकरौं मुँहों सं निकललै 'जे काम बिजली बाबू के छेलै वहु काम तोंही करी दिखैलौ । एत्तें बड़ौं ऋण तोहें हमरा पर छोड़ी रहलौं छौ कि है जन्मों में तें नहिये, अगलौ जन्म में हेकरा चुकाना मुश्किल होतै ।

—अरे हेनौं कुछवे बात नै छै बहिन । आदमी कुछवे नै करै छै, सब ईश्वर के इच्छा छेकै । आदमी तें ऊ इच्छा के दोहे भर वास्तें छै ।तें हम्ममें की है मानियै, तोरा ई संबंध पसन्द छै ?

—बड़ौं भाय, हमरा बस एक्के चिन्ता रही गेलौं छेलै, ई बिजली के शादी । वहु दुख आय तोहें कृष्ण बनी कें हरि लेलौ ।

—तें ठीक छै, हम्ममें यही महिना में फेनु ऐवौं आरो अश्वघोष कें लैकें पूर्णियां जैवौं । तब तांय हम्ममें रामसेवक बाबू सं आरो बात करी लियै । तोरा कोय परेशानी नै होथौं बहिन, सब व्यवस्था हम्ममें ठीक करी लेबै । बस एक्के व्यवस्था तोहें आज हमरा लें करी दियौं । बहुत दिनों सं बढ़ियाँ खाना नै खाबें पारलें छी आरो तोरौं हाथों के खाना खेलौं आदमी तें धरती पर स्वर्गों सं उतरी ऐतै । धनबादों में तोरौं हाथों के खेलौं भूलै नै पारै छियै ।...बस तोहें रोसै में जुटी जा, हम्ममें तोरौं आफिसर चन्द्रकान्त सिंह सं मिलिकें आवी जाय छियौं । बस घंटा भरी में आवी रहलौं छियौं । हुन्ने बच्ची रोसै में गेलै आरो हिन्ने श्रीवास्तव

बाबू चन्द्रकान्त सिंह कन ।

:: २८ ::

बच्ची कें ई बातों के कुछवे ज्ञान नै छेलै कि जों श्रीवास्तव बाबू ओकरो बराबर ध्यान राखी रहलौ छेलै, तें सेमल हुनका सें कहीं जादा ओकरो एकेक क्षणों के निगरानी ।...आय सेमल सांझकिये सें उदास छै । पटना सें ओकरो मित्र टेलीफोन द्वारा खबर भेजलें छै कि श्रीवास्तव बाबू नाम के कोय अधवेसु बिजली के बीहा-शादी पक्की करी कें ऐलौ छै । सेमल कें कुछ समझै में नै आवै छै कि वैं की करें ।

—देख बेटा, हेना गुमसम आरो चुपचाप बैठलौ रहला सें कुछ काम नै चलथौं जों कहीं दहेज में पतोहू ई मकान आरो जमीन लिखी देलखौं तें भीख मांगै के नौबत आवी जैतै ।...अरे हम्मू औरते छियै । औरत के मोन-मिजाज खूब जानै छियै । कत्तों रणचण्डी काली बनलौ रहें, एकबार नरम बनी कें दिल जीतै के कोशिश मरद करै तें वही औरत मोम-मोम । हम्में कहै छियौं तोहें पटना जा आरो दिल जीतै के कोशिश करौं । कहौ कि बिजली हमरों बेटी छेकी, हम्में लिखा-पढ़ी सें लै कें कन्यादान तक करवै । हेकरा में समाजों के हेनों के आदमी होतै, जे तोरों बात के साथ नै देखौं ।”

—देख माय, तोहें की समझी रहलौ छें, ऊ बात अबकी नै हुवें पारतै । रणचण्डी कें अबकी मनाय के मतलब छै, आपनों मूंडी कटवैवों । हम्में खूब समझै छियै कि ई हालतों में की करना चाहियौं । तुलसी गलती नै कहलें छै । ढोल आरो नारी मार खाय के अधिकारी । तोहें चिन्ता नै करै माय । हम्मू कल्ले पटना जाय छियौ आरो बंदूक के जोरों सें कागजों पर लिखाय कें लानै छियौ । ओकरो मरलौ बाबुओ

अंतहीन वैतरणी □ ७१

चाहतै कि है मकान आरो जमीन नतनी के नामों पर लिखी दिवै ऊ नै हुवें पारतै ।...आबें मनाना-जुनाना हमरों वशों के बातो नै छै ।”

—मतरकि बेटा कुछ हेनों-होनों नै होय जांव कि लेनी के बदला देनी पड़ी जाँव । बंदूक में गोली-ओली राखी कें नै जइयों । काँही भूल-चूकों सें छुटिये जाँव तें माय-बेटा दोनों जेले में सड़वों आरो है हवेली सुन्ने रहथौं ।”

—तोहें चुप रहें माय । घोर जनानी बिना खाली रहें पारें मतरकि बंदूक गोली के बिना की ? जोँ वै कागजों पर दसखत नै करतै तें ओकरोँ बेटा कें पहलें ओकरोँ अर्थिये निकलतै । आरो कंधा देतै ओकरें नया साँय पूर्णानन्द श्रीवास्तव ।”

—हमरों बात मानों तें अभी रुकी जा बेटा । पहलें ई सब जानी-सुनी लें कि आखिर बीहा-शादी ठीक होय छै कि नै ? जोँ बीहा में कोय भाँगटों लागी जाय छै तें ई कुहराम मचैला सें की फायदा । कोन मारै वै हमरों सुखों पर छीना-झपटी करी रहलौं छै । जोँ है मालूम होय जाय छै कि बीहा-शादी आपनों पैसा सें करी रहलौं छै, तें तोरोँ चुप्पे रहला में फायदा छौं ।

नै, फैसला आबें होइये कें रहतै । रोज-रोज मनोँ में महाभारत होइये जाय । पटना सें तें यहू खबर ऐलौं छै कि है शादी जेठे में होतै आरो जेठ आवै में अभी नौ-दस महिना छै । है आसिन चली रहलौं छै । एत्तें दिन हममें पागल नै बनलौं रहै सकै छी ।

—बेटा कत्तो भूख लागलौं रहें, जानवरो चारो गोड़ सें नै खाय छै । धीरज, धर्म, मित्र आरू नारी, आपत काल परखिए चारी । धैर्य धरोँ सब ठीक होतै ।

आरो भाय के बात सुनी सेमल सचमुचे स्थिर हुवें लागलौं छेलै । ओकरोँ उफान बिन्डोवों बनी कें शांत होय गेलौं छेलै ।

नहिं आये हो हमारे श्याम ।
सावन न आये भादो न आये
बहि चलि नदिया उमड़ि चलि नारे ।
क्वारौ न आये कार्तिक नहिं आये
उई गई जुन्हैया छिटकि गये तारे ।
अगहन न आये पूस न आये
तर काँपै गडुआ ऊपर काँपै सेज ।
माघ नहिं आये फागुन नहिं आये
उड़त गुलाल खेले सखि फाग ।
चैतो न आये वैशाखो न आये
फरि गये अमुवा फूलि रहे टेसू ।

सेमल नै ऐलों छेलै । जेठ ऐथें-ऐथें बच्ची पहुँची गेलै । बच्चिये
भागलपुर ऐलों छेलै, सेमल सें मिलै लें ।

एकदम पड़पड़िया धूपों में तमतमैलों । आधों कुम्हलैलों फूल
जेना झुलसी कें रहि गेलों रहें । रिक्सा सें नीचे उतरथें बच्ची सीधे ऊपर
चढ़ी ऐलों छेलै । नीचें के कोठरी में ओघरैतें सासैं ओकरा ऊपर चढ़तें
देखलें छेलै मतर कुछ टोकलें नै छेलै । मनो में ढेर सिनी शंका उठलों
छेलै, पर चुपचाप पड़ले रहलै । शायद ई सोची कें कि चिड़ियाँ आपने
आप पिंजड़ा में आवी गेलों छै, ऊ करवट बदली कें निश्चिन्त सुती
रहलै ।

जखनी बच्ची ऊपर पहुँचलै तखनी तपासों सें परेशान सेमलो
ओघराय के कोशिश करी रहलों छेलै । बच्ची कें सामना देखलकै तें
उठी कें बैठी गेलै आरो बड़ों रुक्खों बोली में कहलकै,

—कहों, बहुत सालों बाद यहाँकरों ख्याल ऐलों । की, बदलिये
तें नैनी कराय ऐलों छों ? आकि कोनों विपत्ति ऐलों छों ?

—कैन्हें, पूर्णानंद श्रीवास्तव बाबू ई धरती पर नै रहलात की ?”

—सुनों, हेनों बात नै करों । हुनी तभियो ई धरती पर रहतै, जबे हम्मू नै रहवै । हुनी तें हमरा ले ऊ करलें छै जे हमरों..... ।

—हों-हों, कहों नी कि जे हमरों सांय नै करलें छै । की ? आखिर ऊ सांय जे छेकौं ।

—शरम नै आवै छौ तोरा हेनों शब्द मुँहों सें निकालतें । हुनी तें हमरों भाय छेकै, भाइयो सें बढी कें । आय हुनी नै होतियै तें नै जानौं हम्में बाजार में बैठलें रहतियै कि सड़कों पर । तोहें देवता आदमी कें दुबलें छौ, तोहीं हेकरों फल जानवा । हम्में गलती करलें कि यहाँ ऐलौ । हम्में जाय छियौं आरो आबें तोरों बिना बिजली के बीहा होतै ।

ई कही बच्ची पीछू घुमी दुआरी दिस मुड़वे करतियै कि सेमलें कोना में पड़लें बन्दूक उठाय लेलकै, आरो हाथ घसीटतें दूसरों कोठरी में लै गेलै । बच्ची के सौंसे देह घामों सें नहावें लागलें छेलै आरो सेमल बन्दूक ओकरों ऊपर तानलें चिकरी रहलें छेलै,

—ई तें जानवे करै छियै कि तोहें आबें हमरों साथ नै, श्रीवास्तवें के साथे रहैवाली छौ । मतरकि हेकरों पहले सामना में कागज राखलें छै । तोरा कुछुवे नै करना छौं, बस एतनै करों कि कागज के नीचे में दसखत करी दौ । जों जानै लें चाहै छौं कि ई कागज कथी के छेकै तें जानी ला । हों-हों जानिये ला ताकि कल है न कहियो कि अनजानों में राखी कें दसखत कराय लेलकै ।...ई कागज में लिखलें छै कि हम्में, यानी तोहें है हवेली आरो सबौरवाला दसबिधिया जमीन हमरों नामें खुशी सें लिखी रहलें छौं आरो आय सें तोहें नै, हम्में ई सम्पत्ति के मालिक होवै ।...बोलों ई कागज पर दसखत करै छौं कि नै, नै तें ई बन्दूके दसखत करैथौं ।

—करवै ।

बच्ची आरो कुछुवे नै बोलें पारलै । ओकरों आँसू आरो धाम दोनों मिली कें ओकरा तरबतर करी रहलें छेलै । ऊ आहिस्ता सें उठलै आरो बैठले-बैठले कागज कें हाथों में लै लेलकै । कागज लेना छेलै, कि सेमलें एक दिस पड़लें कलम के लातों सें ओकरों दिस ठेली देलकै ।

बच्ची कागजों पर नजरो नै दौड़लकै, खाली एक दिसों में दसखत करी देलकै । दसखत-तारीख लिखथैं सेमलें झपटी कें ऊ कागज आपनों हाथों में करी लेलकै । आरो कहलकै,

—आबें तोहें पूर्णानन्द कन रहों या अवधूतानंद कन, हमरा सें कोय मतलब नै ।”

—मतरकि जाय सें पहले एगो आरो सम्पत्ति बची गेलों छों, आय वहू सम्पत्ति हम्में चाहै छियै कि तोरों नामे लिखी दियों । नै जानों, है लिखा-पढ़ी के हेनों वक्त फेनू आबें पारें की नै ।

—ऊ की छेकै ?

सेमल के आवाजों में आभियो होनै कड़वाहट छेलै ।

—तोरों बेटा हमरों पास छों । कोय दोसरा के नै छेकै । तांत्रिक के आशीर्वाद सें पैलों तोरों बेटा ! हम्में जानै छियै कि वहू सम्पत्ति हम्में नै राखें सकवै । तांत्रिक के आशीर्वाद तोरे होथों हमरों नै हुवें पारें । जबें पतिये नै होतै तें पुत की होतै !....होइये जैतें तें तोरों अंश हमरा जिन्दगी भर सुक्खों सें नै रहें देतै । बापों के लहू बेटा में बोलवे करै छै, बोलवें करतै । ई हमरों आत्मा कही रहलों छै ।

बच्ची के आँखी सें लोर रहि-रहि टपकी रहलों छेलै मतरकि ओकरो कहे में आवें कहीं कपसवों या घबराहट नै रहि गेलों छेलै । है सब परिवर्तन तुरते केना होय गेलों छेलै, बच्चियो कें नै मालूम । बस ऊ तें बोललें चल्लों जाय रहलें छेलै । तोरा हमरा पर पूर्ण अधिकार छेलें । वहीं तोरा नै चाहियो, तोरा चाहियो खाली हमरों सम्पत्ति । शादी के बाद सें हम्में ई बुझतें आवी रहलें छियो, मतरकि कुछ नै कहलियो । कुछ नै कहलियो । तोरा परमेश्वर छोड़ी कें आरो की जानलियो ? विश्वास कें खंडित करलें छों । औरत के सहजता-समर्पण कें छललें छों । तोहें हमरों परीक्षा सीते रं लेतें ऐलें छों । मतरकि हमरा हेकरो कोय दुख नै । तोहें सीता कें धरती में गाड़ी जो सुखी होय लें चाहै छों, तोरों मॉन पूरें । मतरकि समैयो बड़ी त्यागी होय छै । देर-सबेर हमरों-तोरों न्याय लिखलें जैतै आरो दोनों कें नीति-अनीति के

फॉल के भागी बनै लें पड़तै ।' धरती के देवता बेमान बनी जाय तें बनी जाय, ऊपरों के देवता केन्हों के बेमान नै बनें पारें । कहतें-कहतें बच्ची वहाँ सें उठी गेलों छेलै आरो अलमारी खोली के आपन्हें एकठो सादा कागज निकाली लेलें छेलै, आरो कागज पर ई लिखी कि अश्वघोष पर सेमल जी के पूर्ण अधिकार छै, जेकरा माता रूपों में हम्में पाललें ऐलियै, आय वही पुत्र पर हम्में सेमल जी के पूर्ण अधिकार के घोषणा करै छियै ।' कागज के नीचे एक दिस में दसखत करी सेमलों ओर बढ़ाय देलें छेलै । सेमलो ऊ कागज के बिना राग-द्वेष के ले लेलें छेलै ।

मतरकि बच्ची के सामना खड़ा होय के समरथ सेमल के पास नै रहि गेलों छेलै । शायद यही कारणें आपनों बंदूक लेलें पीछू वाला कोठरी में चल्लों गेलों छेलै ।

सेमल के बाहर निकलथैं बच्चियो बाहर निकलै लें तैयार होय गेलै । ओकरा आपनों घोर श्मशान लागें लागलों छेलै, जहाँ लहाश आरो कंकाल के सिवा कुछ नै रहें । घरों के एकेक सामान ओकरा फेकलों हड्डी हाड़ नाँखी दिखावें लागलों छेलै आरो पलंग-खाट जेना चिता आरो चचरी । ऊ कांपी उठलै आरो क्षणें में कोठरी सें बाहर निकली मुख्य हौल में चल्लों ऐलै जहाँ सें नीचे जाय लें रास्ता खुलै छेलै ।

वैं एक बार हौल के चारो दिस आपनों आँख घुमैलकै । हौल के बीचोबीच छत्तों सें लटकलों शीशा के झाड़-फानूस खतम होय चुकलों छेलै आरो बड़ों-बड़ों अलमारी में सजलों पीतल-कासा के साज-सजावट के सामानो । ओकरा कुछवे दुख नै होलै । परों के सम्पत सें मोह केन्हों !

बच्ची हौल सें बाहर निकली ऐलै आरो सीढ़ी के नगीच आवी के एक मिनिट रुकी गेलै । आपनों दोनों हाथों के चूड़ी के बारी-बारी सें कुछ देर लेली देखतें रहलें फेनू झब-झब सीढ़ी सें नीचे उतरतें चललों गेलै । बिना एक्को बार पीछू मुड़लें सीधे सड़कों पर चल्लों ऐलों छेलै । ...रात के रेल पर बैठी जबे बच्ची पटना चल्लों छेलै तबे ओकरो देहों में तनियो टा तज नै बची गेलों छेलै । एकदम निढाल पड़ी रहलों छेलै

आपनों सीटों पर । ओकरो लें आस-पास के लोग, शोरगुल जों ओकरा कुछ लागै तें बस यही कि ऊ फगदोलों पर सुतलों छै आरो फगदोलों के साथ-साथ चलतें लोग 'राम नाम सत' के आवाज करलें जाय रहलें छै । बच्ची कें ई सब सोची अच्छे लागी रहलें छेलै । आखिर आबें जीतों रहै के ही की मानी ? गाड़ी जों-जों आगू बढ़लें जाय रहलें छेलै, बच्ची कें बस हेने लागी रहलें छेलै जेना ऊ मशान के आरो नगीच पहुँचलें जाय रहलें छै आरो देखथैं-देखथैं... । ओकरो ठोरों पर एक फिक्का हँसी के साथे आँखी में लोर डबडबाय ऐलै ।

:: ३० ::

....बिजली के बीहा के बीस बरस बाद । बच्ची आपनों नौकरी-चाकरी छोड़ी कें काशी बसी गेलें छै । विश्वनाथ मंदिर के नगीच एक टुटलें-फुटलें मकान के एक कोठरी में । जहाँ धूप-रौशनी के दरश नै छै । कोठरी के दीवार चकत्ता में जग्घों-जग्घों से झड़ी गेलें छै । मन भिनकाय दै वाला दुर्गन्ध सालो भरी ई कोठरी में बनले रहै छै । मतरकि बच्ची कें आवें कुछवे नै बुझावै छै । नया-नया ऐलें छेलै तें ओकरा छॉट होय होतै, हेनै बुझावै छेलै । पर आवें ओकरा हेनो कुछवो नै बुझावै छै ।

बच्ची कें ई मकान ओकरो ददिहर परिवार के एक संबंधी दिलवाय देलें छै । यही कोठरी में बैठलें-बैठलें बच्ची देवता सिनी के चित्र लुग माला फेरतें रहै छै आरो कुछ-कुछ भजन-कीर्तन । पर बिछावन पर जैथें ओकरो आँखी में बिजली आरो अश्वघोष के तस्वीर नाचें लागै छै । ...शादी के बाद बिजली गेलै तें घुरियो कें देखैलें नै ऐलै. ..खैर बेटी तें आन के धौन होय छै ।...बेटे कहाँ हमरो होलै ?

अंतहीन वैतरणी □ ७७

बच्ची के आँख में एक तस्वीर घुमै छै तें दूसरों, तेसरों, चौथों साथे-साथ घूमै लागै छै ।...बिजली के शादी के ठीक दुए महिना बाद अश्वघोष के बाबू आवी गेलों छेलै, पाँच आदमी साथें वकीलों लेलें-देलें । ...वैं आपन्हें अश्वघोष कें आगू करी देलें छेलै ।...कत्ते कपसी-कपसी कें वैं हमरौ साथें चलै लें कहलें छेलै, आरो कहलें छेलै—माय तोहें जल्दिये आबी जइयें, नै तें हम्मं भागी कें आवी जैवों ।...मतरकि कहाँ कुछवे होलै ।...आरो दस साल बाद वैं एक्के साथ दू खबर सुनलें छेलै. .. श्रीवास्तव बाबू के इन्तकाल आरो अश्वघोष के बीहा ।...पहलें बीहे के खबर मिललें छेलै, बाद में हुनको इन्तकाल के समाचार ।...ऊ खुशो नै हुवें पारलों छेलै कि कानतें-कानतें ओकरो दोनों आँख पलाशों के फूल बनी गेलों छेलै ।...हुनको मिरतु सें दुखित होय कें नौकरी छोड़वों आरो सब कुछ सें विरक्त बनी घरों में कपसतें रहवों ।...सब कुछ ।

बच्ची चाहै छै अनठाय कें सुती रहें मतरकि ओकरो दिमागों सें यादों के जुड़लों-जुड़लों तस्वीर हटतै नै छै ।...वैं एक संबंधी हाथें अश्वघोष कें खबर देलें छेलै, एकबार देखी जाय लें । मतरकि अश्वघोष नै ऐलों छेलै ।...संबंधिये हाथें कही भेजलें छेलै—आय माय दुख काटी रहलें छै तें हेकरा में सरासर मैइये के गलती छै । माय कें चाहियों कि बाबू सें आबी कें क्षमा मांगी लौ ।’...संबंधी यहू कहलें छेलै—‘अश्वघोष एक बच्चा के बाबू बनी गेलों छै ।...कनियैन तें मेमेसाहब छों, मेमसाहब । जेन्हों देखै में, होनै पढ़ै-लिखै, सिलाय-फोड़ाय करै में ।...ओकरो । मॉन कत्ते बेचैन होय गेलों छलै आपनों बेटा-पतोहू-पोता कें देखै लें ।...आरो महिने बाद ऊ आपनों सब कुछ दान-दून करी कें काशीवास करैलें आवी गेलों छेलै, जीवन के असीम शांति पावैलें ।

बच्ची आपनों जिनगी ईश्वर के गोड़ों पर नेछावर करी देलें छै । भजन करते-करतें बीचों-बीचों में धरती सें उठाय लैकें बिनतियो प्रभु सें करतें चलै छै । मतरकि प्रभु ओकरा सें उदासे छै । यै सें ओकरा ईश्वर के प्रति नाराजगी छै, यहू बात नै छै । बच्ची कें विश्वास छै, एक दिन

प्रभु ओकरों विनती जरूरे सुनतै आरो ओकरों जिनगी के सब ताप खतम होय जैतै । पता नै ई सब कहिया होतै । बच्ची रोज एकदम भिनसरे उठी कें निंदवासलों देवी-देवता कें जगाय आवै छै आरो घंटो गंगा के लहरैतें धार कें देखतें रहै छै । पहलें तें बच्ची कें ई सोचिये काफी संतोष होय जाय छेलै कि मरै वक्ती काशी के गंगा-जॉल ओकरों मुँहों में पड़तै आरो ओकरा खंड गोलोक मिली जैतै । मतरकि यहू विश्वास आबें ओकरा हरखित नै करै छै । बच्ची कें गंगा वैतरणिये रं दिखावै छै, पर यै पार तांय लै जाय वाला कोय नै देखी कें ऊ हहरी उठै छै । सीलन भरलों कोठरी में जागलों-निंदवासलों बस यही सोचतें रहै छै कि ई जिनगी भी की जिनगी जेकरा नै भूलोक के सुख नसीब छै, नै गोलोक के ?

दिन आवी कें रोशनी अग-जग से उलझी जाय छै आरो रात आवी कें गुजगुज अन्हार । मतरकि आँख खुललों रहलों पर बच्ची कें नै तें रोशनिये बुझावै छै आरो नै तें अन्हार । बस धरती आरो आकाश के स्मृति-आशा रेगिस्तान में विन्डोवों नाँखी ओकरों मनो में दौड़तें हाँफतें रहै छै ।



आभा पूर्व : एक संक्षिप्त परिचय

- जन्म तिथि : २३ अक्टूबर १९६४ ई.
जन्म स्थान : भागलपुर
माता का नाम : जीवनलता पूर्वे
पिता का नाम : रूद्रदत्त पूर्वे
शिक्षा : एम.ए.(गोल्ड मेडल), पी-एचडी
प्रकाशन : देश भर की विभिन्न पत्र-पत्रिकाओं में रचनाएँ प्रकाशित
संकलनों में रचनाएँ : चम्पा फूलै डारे डार, आधुनिक अंगिका काव्य कोश, हे दशरथ के राम आदि दर्जनाधिक संकलनों में रचनाएँ प्रकाशित
सम्पादन : 'नया हस्तक्षेप' (अनियमितकालीन पत्रिका) के अलावा १. गीत-गंगा (अंगिका गीत संग्रह), २. नवगीतकार मधुसूदन साहा, ३. अर्द्धनारीश्वर (हिन्दी कहानियों का पंजाबी अनुवाद), ४. जीवनलता पूर्वे : शांत नदी की अनंत यात्रा (अंग महिला साहित्यकार संसद, भागलपुर), ५. अंगिका लोकसाहित्य : एक अध्ययन (अंगिका संसद, भागलपुर), ६. केकरोँ चाँद केन्हों चाँद (अंगिका संसद, भागलपुर), ७. खोई हुई लड़की का खत (अंगिका संसद, भागलपुर), ८. डॉ. अमरेन्द्रः व्यक्तित्व और वागर्थ (कामायनी, भागलपुर), ९. डॉ. अमरेन्द्र : संदर्भ और साहित्य (समीक्षा प्रकाशन, दिल्ली)
प्रकाशित पुस्तकें : १. अंतहीन वैतरणी (अंगिका उपन्यास), २. चन्दन जल न जाए (कहानी-संग्रह), ३. शरीष की सुधा (कहानी-संग्रह), ४. जब-जब झरे शृंगार (दोहा-संग्रह), ५. गुलमोहर का गाँव (कविता-संग्रह), ६. नागफनी के फूल (गजल-संग्रह), ७. शिशिर की धूप (कविता संग्रह), ८. नमामि गंगे (कविता-संग्रह), ९. ताँका शतक, १०. कुँवर विजयमल (हिन्दी उपन्यास)
सम्पर्क : शरतचंद पथ, मशाकचक, भागलपुर (बिहार)
८० □ अंतहीन वैतरणी